

李文忠公奏稿

李文忠公奏稿

卷之十三目錄

籌勦張總愚捻股摺

同治七年正月十一日

請飭辦堅壁清野片

同治七年正月十二日

請派張樹聲辦轉運片

同治七年正月十二日

覆奏督軍北上摺

同治七年正月十六日

渡黃察辦轉運相機調度摺

同治七年正月二十八日

請籌圍賊之策片

同治七年正月二十八日

行抵德州籌辦防勦情形摺

同治七年二月十一日

覆陳進勦情形摺

同治七年二月十五日

安平獲勝督軍進勦摺

同治七年二月二十日

官軍兜勦大捷信賊南趨摺

同治七年二月二十九日

唐殿魁請卹片 同治七年二月二十九日

行抵南宮擬由大名追擊摺 同治七年三月初六日

自大名抵開州並滑縣獲勝摺 同治七年三月十五日

賊向東竄與左宗棠籌商夾擊摺 同治七年三月二十四日

東昌追剿獲勝摺 同治七年三月三十日

追賊北上附陳籌畫情形摺 同治七年四月初八日

由東境轉戰入直沿途疊勝摺 同治七年四月十二日

賊竄西南籌商布置情形摺 同治七年四月十七日

賊趨東北官軍分投兜剿摺 同治七年四月二十三日

覆奏催飭劉銘傳北上片 同治七年四月二十三日

馳往滄州仍回德州調度摺 同治七年閏四月初二日

各軍兜剿獲勝摺 同治七年閏四月十一日

兜勦獲勝並布置火礮摺

同治七年閏四月二十日

張宋襲賊獲勝片

同治七年閏四月二十日

劉銘傳患病片

同治七年閏四月二十日

袁保恆派全軍翼長片

同治七年閏四月二十日

各軍兜勦獲勝摺

同治七年五月初二日

銘軍四案彙保摺

同治七年五月初二日

議防馬頰河就地燧勦摺

同治七年五月十五日

築馬頰河長牆片

同治七年五月十五日

墊發陳國瑞軍餉片

同治七年五月十五日

各軍兜勦連獲大勝摺

同治七年五月三十日

德平獲勝片

同治七年五月三十日

李文忠公奏稿卷十三

全集一之十三

桐城吳汝綸編錄

籌勦張總愚捻股摺

同治七年正月十二日

奏爲張總愚捻股突竄畿南遵

旨籌派各軍由東入直相機勦勦臣趕緊布置後路各事卽起程北上督率調度恭摺奏祈

聖鑒事竊東捻任賴等股勦除後業將臣軍將士馳逐數年疲憊已甚宜稍休養難遽遠役各實情附片懇陳仰蒙

恩諭准予休息各營追賊南下至歲杪正月初始收隊回營人困馬乏勞苦萬狀臣徧加拊循宣傳

德意靡不感激涕零挾纒同溫旋奉正月初一初四初七等日

寄諭飭催劉銘傳善慶溫德勒克西馬步各營迅赴河北進勦臣

查劉銘傳一軍自同治四年春開奉調北征馳逐數省迄未稍休  
戰功最多而疲勞亦最甚臘月下旬劉銘傳自清江追賊回邳州  
灘上老營函稱積受寒溼傷疾並發兩腿麻木瘡癩徧體不能乘  
騎諄請開缺卸兵或乞假三箇月暫予調養等情臣派員前往看  
視患病屬實焦灼無似因屬臣弟李昭慶順道勸慰並請其由水  
路力疾同舟來濟甯晤商一切除夕到濟臣與朝夕聚會精神雖  
尚可支惟腿疾增劇萬難騎馬肝氣上衝動輒憤怒暴急不能自  
已蓋由秉性忠勇追賊三年之久艱苦備嘗心力交瘁至任賴諸  
逆俱滅而其身亦病矣疊蒙  
諭旨飭赴河北彼亦以張總愚股匪亟須勦辦但體氣久虧力不  
從心自恨負

恩辜職惟求寬予假期臣既慄

聖訓催督之嚴又憐該提督積勞致病之苦又恐

畿疆有警無能解救旁皇中夜寢食難安合無仰懇

聖慈暫予賞假調養俟劉銘傳病體稍愈臣卽催令督隊北行欲

圖期滅張捻非該提督親臨前敵恐不能收功耳至善慶溫德勒

克西馬隊共千餘名善慶所部由河南帶來七百餘名加以僧格

林沁舊部黃旗馬隊三百餘名均係吉林黑龍江官兵出征十數

年疲病思歸久無鬪志劉銘傳善慶屢請撤換臣以軍事緊急慮

致耽延每激勸該軍如同心努力將任賴巨股撲滅定爲懇

恩凱撤回旗溫德勒克西所帶察哈爾馬隊三百餘名亦甚疲乏

臘杪東捻告平善慶等卽稟稱各起官兵均求撤回其時已奉

寄諭調赴直隸臣愧無詞以對將士遂函屬善慶溫德勒克西由

邳州老營來濟剴切勸諭或張捻速平再行凱撤或到直隸片有

他隊撥補卽行撤換該副都統等深明大義已由灘上調取隊伍  
整頓鞍馬剋期北行善慶溫德勒克西熟習勒拏機宜惟所部太  
單又極疲憊不足自當一路與淮軍步隊依護旣久親若弟昆若  
益以勁騎輔以臣軍或可爲

國家捍禦畿圍也正繕摺聞又欽奉正月初八日

寄諭賊窺開州井店地方與畿輔路路可通該大臣如山山東徑  
趨直境督率所調各軍自北而南節節進剿較爲得勢等因並准  
河南撫臣李鶴年函稱張曜宋慶兩軍在湯陰擊賊大勝但馬隊  
太少不能制賊死命賊已北趨邯鄲一路臣查直豫交界地勢平  
坦賊騎馳騁必速畿南各屬向少寨堡猝被寇警蹂躪何堪聞信  
之餘焦憤莫釋臣軍專期任賴等股力竭筋疲已成強弩之末劉  
銘傳適因傷病漸難遠征諸將亦多告疲乏休養整頓實需時日



以行軍常理而論本不宜操之過蹙致有蹉跌惟畿疆警報至  
必當提師赴援臣立即檄調總兵周盛波周盛傳等馬步十一營  
由徐州韓莊拔隊來濟會合藩司潘鼎新鼎宇全軍及善慶溫德  
勒克西馬隊陸續進發由東阿渡黃後視何路有警卽向何路截  
勦臣趕緊布置後路轉運糧餉軍火各事並催提督郭松林楊鼎  
勳整飭大隊隨後繼進臣俟部署稍可就緒卽起程北上督率趨  
行過河後察度賊蹤地勢擇要駐紮妥商調度庶幾稍竭繇薄仰  
慰

宵旰憂勤於萬一所有遵

旨籌派各軍由東入直相機攔勦臣趕緊布置後路各事卽起程  
北上督率調度各緣由謹繕摺由驛六百里覆陳伏乞

皇太后

皇上聖鑒訓示謹

奏

請飭辦堅壁清野片

同治七年正月十二日

再辦流寇以堅壁清野爲上策嘉慶初年川楚教匪辦理十數年卒賴此以收功卽任賴捻股流竄中原數省畏圩寨甚於畏兵豫東淮北民風強悍被害已久遂漸添築圩寨深溝高壘到處與城池相等是以捻逆一過卽走不能久停肆擾近年惟湖北陝西被擾最甚以素無圩寨籌辦不及賊得盤旋飽掠其勢愈張直晉向無捻患民氣尤爲樸懦未能築寨自守張總愚本極狡猾又係窮寇南有黃河之阻必致縱橫馳突無處不流百姓驚徒蹂躪詎有已時徒深浩歎且畿疆河北平原曠野古稱四戰之地無險可守辦流賊與辦守城踞寨之賊情形迥異流賊專於避兵守此則竄彼迎左則趨右交臂旋失情勢使然非盡兵將之不力也聞該逆自竄陝西北山後渡黃入晉沿途擄獲驛馬愈眾步賊多改爲騎

我軍騎少步多卽騎兵每人不過一馬追逐病斃卽已無馬視賊  
匪每人可二三騎隨地擄添情形則又迥異自古辦賊必以彼此  
強弱飢飽爲定衡賊未必強於官軍但彼馬多而我馬少自有不  
相及之勢彼可隨地擄糧我須隨地購糧賊常飽而兵常飢又有  
不能及之理今欲絕賊糧斷賊馬惟有苦勸嚴諭直隸山西河北  
紳民趕緊築圩寨一有警信收糧草牲畜老弱壯丁於內旣自  
固其身家兼以制賊死命及今爲之亡羊補牢尙未甚晚若待深  
受荼毒再議補築經費更難措籌如果十里一寨賊至無所掠食  
兵至轉可買食賊雖流而其技漸窮或可剋期撲滅伏乞  
皇上特頒訓諭諄飭地方官紳安速籌辦實力奉行勿以空文搪  
塞於軍務大局裨益匪淺臣深知捻賊無攻城伎倆無奸細內應  
卽圩寨堅密亦不敢攻仍求隨時

申儆近畿大小官吏遇警鎮靜嚴守城隘賊必避而他走切勿誤  
聽訛言驚惶遷徙致亂人心區區愚慮敢再冒瀆上陳惟祈  
聖鑒謹附片具

奏

請派張樹聲辦轉運片

同治七年正月十二日

再行軍以籌糧爲第一要義去年圍賊運東併軍兜剿疊請

飭下山東撫臣嚴飭州縣酌提公款購備米麩草料俟追軍過境

給價取用該撫遵飭各地方官照辦臣並另委員紳分投購儲嗣

各軍追賊過緊日行或百數十里不及迂道借糧仍有忍飢數日

未飽一餐者若毫無儲備必至譁潰貽誤臣每與諸將討論軍情

不慮捻之難打實畏兵之常飢劉銘傳轉戰最久追逐最速總以

萬眾枵腹爲勦捻最苦之境臣從前往來直隸道中目擊地瘠民

貧上年旱澇尤甚赤地千里米珠薪桂客軍所過欲立籌數萬人

之食多齎數日之糧斷不可得此最可憂臣軍皆係南人素食大

米北征以來賴曾國藩創爲四鎮屯兵之議就運河淮河爲糧路

源源運濟倖告成功茲遽移往無米糧無運道之區辦理諸形掣

肘查直隸臬司張樹聲深知軍士艱苦熟習地方情形應請

飭派該臬司籌辦臣軍赴直後轉運糧粬各事宜並

敕下署直隸督臣王文嚴飭各州縣豫提公款起購糧草麵料各  
十萬斤儲備公所俟援軍過境給價取用輓轡周轉照數買補屆  
時如有缺誤由臣等據實奏參聞天津倉儲有粳米可否懇

恩先行借撥二三萬石貴成張樹聲督率印委由水道分運河開

保定大名等處儲存以濟軍食再由江蘇督撫臣照數籌運歸補

臣仍咨商江蘇撫臣齊同上海道隨時由滬搭海船運解糧餉軍

火至津轉運行營俾資接濟所有豫籌軍食各緣由伏乞

聖鑒迅飭施行謹附片具

奏

擬奏督軍北上摺

同治七年正月十六日

奏爲遵

旨據實覆奏並迅撥潘鼎新善慶溫德勒克西郭松林楊鼎勳周  
盛波唐仁廉諸軍倍道入援臣草草布置後路刻日親督北上  
先後起程日期恭摺馳陳仰祈

聖鑒事竊臣昨因張總愚股匪突過漳河竄擾畿南卽經派撥山  
東藩司潘鼎新副都統善慶溫德勒克西等軍赴直會剿及臣親  
督入衛各情形於十二日馳報在案茲接奉正月十二日內閣奉  
上諭本日據官文崇厚奏捻匪北竄衡水定州一帶等因欽此並  
連奉正月初十二日

寄諭各一道臣跪讀之餘戰慄惶憤急莫可名狀惟奉

旨查詢劉銘傳善慶溫德勒克西各軍是否李鴻章於接奉諭旨



後未經催令起程抑係該員等任意逗留著據實覆奏臣前已略

陳梗概敢再將實在情形爲我

皇上瀝陳之查臣軍自入東勦擒以來任賴等股約十萬眾肆擾

東境兇燄鴟張臣每念此賊不平則中原之禍靡有已時卽西北

之憂亦未有艾而滅賊大計要必於冬春之交乘其飢困併力殄

除故於運黃兩防布置穩固後卽選將併兵與之角逐嚴督諸將

剋日圖功諸軍耐凍忍飢日馳百數十里始棄輜重後并鍋帳而

棄之各裹乾糧日夜奔逐用能仰託

威福倖立寸功自壽光大捷以後餘賊全趨海贛下走淮揚東境

已無賊蹤東軍亦早回防休息而臣軍仍乘勝南下直追至揚州

分至安徽之盱眙五河等處生擒巨寇殄平餘孽年底始克蕪事

劉銘傳善慶溫德勒克西於十二月二十五六等日分起馳回邳

州灘上老營潘鼎新郭松林楊鼎勳諸軍於十二月二十九三十  
正月初二三等日先後回至濟甯老營解甲暫息臣親加拊視各  
士卒面無人色手胼足胝衣履不全疲憊不堪馬匹倒斃大半疊  
經奏明有案仰荷

聖慈准暫予休息合營感戴

皇仁歡呼雷動劉銘傳三年轉戰勞苦尤甚積受寒溼手足麻木  
瘡癩徧體不能乘騎臣因該提督素資得力屬其始終奮勉毋得  
偷安而目擊其狼狽情形策勵之餘實深矜憫臣以勦辦東捻爲  
己責初不料西捻張總愚一股由山右直趨河朔又肆蔓延慮事  
之疏咎無可辭先奉

諭旨准劉銘傳將所部稍爲休養整頓正月初旬疊奉

諭旨催令劉銘傳善慶等赴河北進剿臣卽嚴飭各營趕緊汰去

病弱添補缺額製辦衣履整備鞍馬不准刻延向來游擊之師疲勞已甚須休養整練兩三月然後可用今尙未踰兩旬也各營向以火器制勝子藥鎗礮軍裝均須配帶自去冬輕騎逐賊鍋帳輜重沿途拋棄寄頓今奉調遠征必應逐件收集並另行添補又糧臺分設徐州清江領給餉項往來千里動需時日軍中事件繁瑣有一不給難以遠行若倉猝登程徒有赴援之名必難責赴援之效臣深悉兵艱催令起程亦不能不略待齊備將領各知大義既入援畿輔斷不敢有意逗留茲奉

諭旨賊勢深入畿疆臣聞信之餘五中欲裂恨不奮飛馳援稍紓君父之急一切籌備各項亦無暇逐細經營除劉銘傳患病屬實已乞

恩稍予養息所難成行外潘鼎新鼎宇全軍並蔣慶温德勒克西

馬隊已於正月十六日拔營飭令兼程由東阿德景進發唐仁廉  
馬勇於十八日跟蹤北上郭松林楊鼎勳武毅勳字等營亦陸續  
過發臣俟周盛波所部由徐州調到擬於二十日親督啟行由東  
入直查勦捻非馬步大隊不能得勁直境地勢平曠尤須用眾臣  
軍強弩之末遷地弗良事機所值敢稍推諉但冀沿途地方官能  
爲預備糧餉俾無缺乏必當視賊所向繞由東北向西南攔勦聯  
絡諸軍或掎或角共維大局所有據實覆奏及親督諸軍北上日  
期謹繕摺由六百里馳陳伏乞

皇太后

皇上聖鑒訓示謹

奏

渡黃察辦轉運相機調度摺

同治七年正月二十八日

奏為潘鼎新善慶馬步等營行抵直境徑趨饒陽進剿臣由東阿渡黃至張秋察辦轉運催提周盛波郭松林楊鼎勳各軍陸續北上隨時察度賊情相機調度恭摺仰祈

聖鑒事竊臣調派各軍分起援直業於正月二十六日兩次馳陳在案潘鼎新督率所部於十八九日由東阿渡黃善慶溫德勒克西於二十日渡黃唐仁廉馬勇於二十一日渡黃銜尾北發潘鼎新二十日馳抵德州探聞賊由保定南竄饒陽恐其久踞肆擾或東竄河間天津大局攸關因督隊倍道遄征二十一日過直隸景州二十二日抵阜城即改由獻縣西境徑趨饒陽臣知該藩司勇往赴敵隊伍稍單飛飭善慶溫德勒克西唐仁廉等馬隊趕速前進會合兜剿庶可自當一路旋接潘鼎新二十三日獻縣西境

來函云途遇東軍王心安濟勇紛紛回獻詢知該軍二十二日在饒陽接仗挫衄賊馬甚多仍在饒陽一帶該軍即趕前攔擊等語善慶等二十三日抵德州已率部前往大約二十五六日方能與鼎軍會合唐仁廉二十五日續抵德州據稱沿途麩料難購馬力疲乏計潘鼎新日內早有戰事若善唐各營趕上馬步相輔或可稍挫賊鋒殊深焦盼劉松山郭寶昌兩軍已偏饒陽北面該逆疊陷祁饒兩城其散漸熾各軍須穩慎進戰前截後兜此擊彼應先得一二勝仗再厚集其勢與之角逐卽難就地殲除必將窮奔出境若以無制之師單弱之隊輕爲嘗試挫敗旣易賊氣立張故兵家慎言戰以戰而必不勝不如不戰之養威重矣揜極狡悍張總愚尤窮寇死黨非戰勝不足以寒其膽非久戰屢勝之軍則人馬器械徒以餉賊耳所知者劉松山湘軍打仗甚穩郭寶昌皖軍

進隊尙猛。據該提鎮稟報，遠役久追，人馬飢困，恐尙不足大戰。豫軍宋慶、張曜勇隊皆精銳，毫無熟悉，捻情當不至挫現。經官文相機調度，諒臻妥協。臣軍疲憊之餘，又勇丁多係南人，一渡黃河水土食物俱不相習。此次奉調北來，將領迫於大義，勉力邁行。而勇夫無知竊聞北地荒旱，缺糧尚多，逃走亦無可如何之事。臣不敢謂進戰卽有把握，惟督同諸將設法激勸，隨時募補體恤，其艱苦以冀用其死力耳。臣所調周盛波一軍由徐州北來，候至二十日未到。臣卽自帶小隊先行起程，由東阿過黃河順道至張秋運河口，察看後路糧餉軍火轉運事宜，兼候盛軍取齊。昨已督飭委員籌挑黃運交匯淤阻之處，在張秋設立轉運局，以通南北餉道。周盛波在後督押尾隊，先令其弟周盛傳率部北行，頃已趕到張秋。臣卽日督率起行，由東昌至德州，再察賊情，如已南趨，或進駐

冀州大名一帶如賊尙趨東北視何處糧草最便暫行屯紮就近  
調度直境兵馬過眾芻糧不給此最可憂屢咨緘商請署督臣官  
文預籌速辦頃准函覆已令各地方官提款購備並因張樹聲派  
充行營翼長難遽分身另委候補知府張光藻赴河間一帶隨營  
照料嚮導或可無誤軍食郭松林楊鼎勳大隊在濟甯整頓軍裝  
深恐過河以後直東糧草艱細難資飽騰臣又飛催陸續過征據  
報於二十七八等日分起北行黃河渡船稀少若無阻滯二月初  
旬可到該軍過河後察看賊趨何路再向何路兜剿途次疊奉  
寄諭敬悉北路防軍已厚無虞鎡走下懷曷勝欽慰臣軍自可由  
東南相機夾擊以取掎角之勢惟賊善流走直境平坦千里無高  
山大川以扼之兵雖多仍布不滿且強弱不齊殊未易言聚殲此  
實在之事理不敢大言以取咎戾也所有潘鼎新善慶馬步等營



行抵直境徑趨僑陽進勅臣渡黃後至張秋察辦轉運催提周盛  
波郭松林楊鼎勳各軍陸續北上隨時察度調度各緣由謹繕摺  
由驛六百里馳陳伏乞

皇太后

皇上聖鑒訓示謹

奏

請籌圍賊之策片

同治七年正月二十八日

再正繕摺開接據潯州新二十四夜自饒陽縣西張保地方來稟  
二十三夜開拔隊進期二十四日辰刻行抵饒陽城東十餘里遇  
賊邊馬飛奔回竄我軍趕緊追逐適皖軍郭寶昌程文炳自西北  
來會兵勢較盛賊盡敗竄西南各軍分路兜追三十餘里天晚暫  
住賊已趨深州一帶次晨仍約會皖軍探蹤追擊等情臣查東  
北各軍雲集賊知不可深入勢將南趨順廣或循舊路回竄彰衛  
懷或乘虛東擾臨清東昌均未可定臣正由張秋北行雖後隊未  
齊可爲東邊聊作聲援俟過東昌後察探賊蹤所向再定進止一  
面飛催郭松林楊鼎勳等倍道趨行計其渡河尙需旬日卽令徑  
趨東昌大名一帶攔剿仍飛飭潘鼎新善慶等由東北壓追而下  
惟直境西南地勢尤極寬平無險可阻李鶴年在磁州兵力甚單

似亦難於堵遏臣懸揣局勢惟懷慶衛輝北阻太行南隔黃河地  
形較狹似可設法圍制若左宗棠趙長齡等起派軍嚴扼澤潞各  
山口及垣曲來路使其無可竄遁憑山設險本易爲力各軍由東  
北節節兜追過廣平大名後或分紮漳衛各河或進扼懷慶之沁  
河機局更緊再派隊蹙之一隅仍仿照上年扼賊運東稍需時日  
冀收聚殲之效於大局亦無妨礙如不求圍賊之地似難有殄滅  
之期是否有當伏祈

聖明核飭屆時爰細察辦賊情無定而地勢有定比在直晉圍剿  
似較得力各省將帥兼公合力籌商成否雖未敢預知或亦因地  
制宜之法附片具陳仰乞

聖鑒訓示謹

奏

行抵德州籌辦防期情形摺

同治七年二月十一日

奏為

微臣督隊

行抵德州暫駐籌辦防期情形恭摺仰祈

聖鑒事竊

臣由東阿渡黃順赴張秋催提後隊各情業於正月二

十八日馳陳在案二十九日行抵東昌阻雪數日探聞捻逆由高

陽東鼠河閒陷踞嶽縣邊馬擾及交河富莊驛一帶景州德州均

已戒嚴二月初六日雪霽臣即於初七日自東昌督隊趨程北上

途次接豫軍張曜宋慶稟稱初三日會合劉松山郭寶昌等馳抵

河閒西南初四日分路進剿至嶽縣西北賊踞數十村見兵即走

我軍向南追壓擒斬甚夥臣恐該逆被擊乘虛東走飛催郭松林

楊鼎勳各督所部即由東阿徑赴德州攔頭進剿臣初十日行抵

德州郭松林楊鼎勳亦於十一日兼程抵德沿途雨雪泥淖馬駝

倒斃輜重落後軍馬甚形疲乏須暫停息兩日探知捻逆被官軍

由北兜朔初六七日竄衡水境內因滹沱河水勢大漲未能竄渡  
初八日又北竄深州王家井等處陝豫各軍仍分路兜圍臣查德  
州距深州僅二百餘里捻極飄趨向無定德景一路係竄天津  
要道而德州濱臨運河糧草較便臣所駐此間籌提天津米糧以  
濟軍食兼扼東竄之路並飭郭松林楊鼎勳起緊整隊擬由景州  
阜城繞趨深州一帶偵察賊蹤會同各軍由東北向西南兜朔藉  
可屏蔽近畿但慮直境兵多食少糧草購辦不及耳初八日高唐  
州途次始奉到二月初二日  
寄諭飭潘鼎新等暫在北路堵遏旋接潘鼎新善慶稟稱二十九  
日追賊至保定即奉署督臣官文飭紫省西大汲店一帶以堵北  
竄臣當即面飭該司與善慶溫德勒克西唐仁廉等馬隊無論防  
朔必須合併一路如北路情形過緊再督同郭松林楊鼎勳等

聞道繞赴保定一帶會商官文妥辦拱衛京畿以壯聲援而慰  
聖廑所有行抵德州辦防勦各緣由謹繕摺由驛六百里馳陳  
伏乞

皇太后

皇上聖鑒訓示謹

奏

覆陳進剿情形摺

同治七年二月十五日

奏爲欽奉

諭旨恭摺覆陳並派隊進剿情形仰祈

聖鑒事竊臣行抵德州業將籌辦防剿大略於十一日馳陳在案

十二日接奉初五日

諭旨令各統兵大臣並各督撫均歸恭親王等節制等因十三日

接奉初七日

寄諭令臣等抽撥馬步勁旅相機兜剿等因十四日接奉初八日

寄諭崇厚奏賊勢逼近津南飭臣於天津河間一帶相機進紮等

因當卽分別欽遵辦理臣前抵德州探知捻逆盤旋深州衡水交

界距德甚近卽擬派郭松林楊鼎勳大隊由景阜前往兜剿十二

三日該兩軍隊伍輜重整頓齊備卽於十四日由景州武邑西北

徑趨深衡之交視賊所向會合劉松山郭寶昌張曜宋慶等軍分  
路歷期偪賊南趨頃據探報該逆連日被各軍及鄉團堵剿情急  
意欲渡河南竄適滹沱河雪水漲發衡水一帶不能偷渡臣軍又  
自德州進偪逆眾現往西南逃遁等語臣初至此聞不知滹沱河  
上游棗城正定等處水勢若何該處有無防兵逆蹤原無定向若  
不得渡必圖他竄深州一面既有劉松山等軍排進保定防軍亦  
厚計可無虞北竄臣緣東路空虛諄飭郭松林楊鼎勳從東面兜  
進藉以遮蔽景獻一路該兩軍馬步四十營素稱勁旅遇賊當可  
痛剿但恐我軍一到賊已旁竄臣又屬令該提督等無論賊定何  
處總須猛力追壓使之不得喘息臣即日督帶周盛傳馬步十一  
營進紮景州爲郭松林等後繼如該逆越滹沱而南臣再相機進  
駐大名一帶就近調派與左宗棠等會籌布置山東撫臣丁寶楨



現駐河間准咨稱該撫親督王心安七營在河間居中調撥已派楊飛熊八營扼紫任邱又派莫組紳十營四出追剿是其兵力尙非甚單賊勢現趨西南河間情形稍鬆聞該處糧草艱貴似未便兩軍並紮致多擠雜臣軍帶赴北路者郭松林楊鼎勳爲一大枝已派進剿潘鼎新善慶等合爲一枝已派扼紫保定西北礙難移調現僅周盛傳馬步十一營隨臣護衛此外並無他軍其零星各營尙留防黃河以南劉銘傳因病請假所部暫未能北來儻必令臣專防河間天津一帶應請調回郭松林楊鼎勳等勿庸進剿由臣帶赴東北妥籌布扼丁寶楨即可帶東軍回本境分防德州臨清東昌等處伏乞

聖明核示遵行抑臣更有陳耆勦擒與勦他賊情形迥異賊蹤飄忽瞬息百變祇須揀派大枝勁旅敢戰宿將與之隨地兜逐相勢

期辦不能取決進退於數十百里之外致誤機宜臣前在山東辦  
任賴等股只管選將練兵不管臨敵調度諸將皆賴臣無所牽掣  
得以放手期辦倖告成功至防捻亦與防他賊情形迥異捻賊無  
攻城奪寨伎倆故城寨易防而平原難防凡城池失陷必其城已  
倒坍或無壯丁可守也平原四達則只能守城寨城寨之外不能  
禁大股之不衝突馬賊之不游駛惟大山大水可以扼之直境四  
望寬平除渾沱滏陽衛運各河西淀東淀一帶略可設法置守但  
人少亦不濟事此外有期法無堵法其言防言堵似只虛聲而無  
甚實濟臣於辦捻粗有閱歷既有所見不敢不據實瀝陳除咨呈  
神機營王大臣查覈外所有派隊進剿緣由謹繕摺由驛六百里  
馳陳伏祈

皇太后

奏  
皇上聖鑒訓示謹

安平獲勝督軍進期摺

同治七年二月二十日

奏爲郭松林楊鼎勳在安平境內連日勦賊獲勝由東北偏向深  
州東南臣進紮景州派隊就近扼勦恭摺仰祈

聖鑒事竊

臣在德州派隊由景州武邑向西進勦業於十五日馳

陳在案福建提督郭松林湖南提督楊鼎勳會同前敵營務處道  
員段詰於十四日帶隊入直駐景州之龍華鎮探聞賊又由省南  
下竄安平該軍十五日由武強小範鎮過河十六日行九十餘里  
將抵安平城下忽見塵沙蔽天賊騎皆從西北迎捲而上郭松林  
等派馬隊衝進趕調後路步隊接應易用剛吳鳳柱胡連發等帶  
馬勇與賊持戰屢卻屢前小有斬擒乘勝追殺里許步賊從後突  
出如牆排進馬隊小卻郭松林楊鼎勳亟令李長樂宋德鴻高占  
彪唐宏成吳雲集各督步隊馳至鎗矛擊刺鏖戰三時人足馬蹄

蹴塵而起三十里內幾難辨識我軍合力猛進盪決縱橫賊斃甚眾猶敢拚死拒敵楊鼎勳等又派馬隊分左右抄出賊後張逆腹背受敵奪路狂奔我軍追殺將近三鼓始收隊暫息計陣斃悍賊千餘名生擒五百餘名奪獲騾馬器械無數四更後天忽大霧賊乘我疲困繞路竄逸郭松林等復督隊急起追之自西而南至饒陽之楊家村該逆回軍返鬪戰五六合賊酋張志清劉琅夏以仁領數百騎乞降餘眾紛紛向東南敗走追二十餘里劉松山郭寶昌張曜宋慶程文炳等均率軍來會楊鼎勳郭松林與之晤商擬各簡選精銳跟蹤會剿將各軍輜重運存安處俾可輕裝追擊早清畿甸十八日賊又折竄饒陽以北張曜宋慶連夜躡擊郭松林等亦赴饒北迎頭截剿該逆瞥見我軍卽繞回東南由獻縣武邑境內復向西南逃竄盤踞深州交界之留楚鎮現仍商會各軍設

法兜勦據郭松林等呈報前來臣督周盛傳馬步各營十七日行抵景州疊據武強阜城等縣稟報賊在西路各軍兜勦喫緊時恐敗匪東竄景德武衛一帶虛無一兵該逆被勦情急難保不由此徑竄滄青則津郡又形喫重臣隨身值周盛傳十一營已令該總兵挑帶八成行隊徑趨武強小範河口探蹤截勦爲郭松林等援應並遮蔽越河東竄之路疊奉

諭旨飭卽進紮河間賊現敗竄東南景州武邑亦當衝要臣旣派隊進扼自未便遽行北去徒煩更調俟各軍會齊大舉賊蹤趨向稍定臣再相機督軍進紮仍飛飭郭松林楊鼎勳等約會各軍乘勝兜勦以期肅清畿輔仰慰

聖廑其十六日力戰陣亡之擬保總兵銜副將尹昌景參將擬保副將龔興祖擬請

敕部從優議卹以慰忠魂所有郭松林楊鼎勳連日擊賊獲勝並  
臣進茶景州派隊扼剿情形謹繕摺山驛馳陳伏乞

皇太后

皇上聖鑒訓示謹

奏

官軍兜剿大捷偃城南趨摺

同治七年二月二十九日

奏爲官軍連日四路兜剿疊獲大捷偃城南趨據報該逆已搶過  
滹沱河截殺尤眾恭摺仰祈

聖鑒事竊郭松林楊鼎勳等於十六七日在安平擊賊疊勝各情  
業於二十日馳陳在案十八日劉松山郭寶昌喜昌程文炳與豫  
軍張曜宋慶追及於饒陽南旺等處是夜銜枚急進數面壓剿劉  
松山等先破賊踞村莊十餘處斃悍賊數百名拔出難民四五千  
張曜等復由北面繼進生擒數十名該逆向南敗走十九日郭松  
林楊鼎勳整隊迎擊馳五十餘里探賊復橫折而北追至深州東  
北四十里之李家村賊反戈回鬪結十數馬團抵拒楊鼎勳等飭  
馬隊馳進步隊接應兩戰正酣賊陣稍亂猶齊隊猛撲郭松林  
等親督李長樂宋德鴻蔡國祥高占彪唐宏成吳雲集從旁抄擊



而令馬隊合擣中堅鎗擊矛刺斃賊千餘名騎兵衝入亦生擒數百名奪獲騾馬無數賊氣盡奪勒隊徐退我軍乘勝排壓追十數里賊皆縱馬奔去張曜宋慶追軍亦卽起至賊又奔往東南欲由武邑之圈頭過河適臣先派小隊紮堵圈頭橋聯絡民團協守賊知有備二十日以後復由深州南擾竄晉州界內二十一日郭松林等馬隊遇賊於范家村又獲一捷收降鄧新樂等一百餘騎張曜宋慶等趕至晉州西北攔勦小有斬擒該逆又折竄東南二十一日竄近武強之小範河口將欲渡河東竄臣已預飭弁兵協同該處團勇將沿河木橋概行拆去賊騎萬難飛越二十三日賊又由饒陽徑奔肅甯張曜宋慶急馳百餘里抄出城前探知是夜賊踞饒陽東北元城一帶遂知會劉松山郭寶昌等乘夜兜襲二鼓後行近賊巢立卽直前猛撲村旁零星散賊悉置不問該匪驚亂

之餘猶思拒敵經我軍奮力包抄四面齊進立將偽懷王邱德才  
偽幼沃王張五孩所踞兩大莊同時攻燬斬殺無算邱逆一股期  
除殆盡張總愚仍糾齊四面踞賊拚命迎敵鈔極兇猛經張曜宋  
慶督軍鏖戰一時之久逆始亡命狂奔其下馬拒戰之賊皆不及  
騎追殺十餘里賊屍枕藉餘匪敗向西遁計生擒長髮悍賊二百  
餘名內有賊目張立堂蘇付恩陳小奎三名殺斃賊目多名獲馬  
騾二千數百匹旗幟器械二千餘件賊勢衰蹙從此必難復振據  
各該統領稟報前來又據安平縣探報賊於二十四日由該縣竄  
邢州深澤二十五日竄晉州境內聞已由棗城渡河又據武邑縣  
陸時言稟報探得捻逆於二十七日辰刻在晉州棗城交界樓上  
村偷渡滹沱河郭松林楊鼎勳張曜劉松山各軍先後追至賊多  
淹斃其未渡之賊經官軍圍殺殆盡已渡之賊均向南竄各等語

臣現駐景州距西路稍遠未知是否確實郭松林等追賊南去晝  
夜奔馳驛遞梗滯數日未接來信亦未知戰狀何如但據張曜等  
二十四日專弁來而云賊眾屢挫之餘勢頗窮蹙已會商郭松林  
等趕緊追剿當此各軍雲集該逆東奔西走膽落魂驚其乘閒偷  
渡滹沱本在意中臣曾諄屬郭松林張曜等如不能就地兜滅應  
設法痛剿偪令南趨以免畿輔切近之患張曜宋慶等追逐甚速  
夜戰尤力實足伐賊謀而振軍威除俟探確逆蹤南竄情形再行  
相機進扼郭松林等續報戰狀隨時具奏外所有官軍連日四路  
兜剿疊獲大捷倡賊南趨據報已搶過滹沱各緣由謹繕摺由驛  
六百里馳陳伏祈

皇太后

皇上聖鑒謹

奏

唐殿魁請卹片

同治七年二月二十九日

再前記名提督廣西右江鎮總兵唐殿魁於同治六年正月十五日在湖北尹澧河地方勦辦任賴等股捻逆力戰陣亡經臣奏奉諭旨照提督例從優議卹仰荷

恩褒忠烈允足激勸戎行臣查唐殿魁籍隸廬州自咸豐年間倡辦鄉團南禦粵匪北擊苗逆所向有功同治元年隨臣帶勇赴滬疊復奉賢南匯川沙柘林常熟江陰無錫各城嗣進攻常州賊眾兵單屢瀕於危賴該員堅忍血戰數月而後克臣察其才堪大用為添募三千人令隨劉銘傳渡淮勦捻馳逐東豫皖鄂數省又身經百餘戰無戰不捷數年追賊忍飢耐寒不稍懈志平日諄諄以練兵愛民爲事所到之處軍威整肅輿情愛戴實爲淮軍諸將之冠卽論戰績亦無與並自尹澧河陣沒後銘軍失此良將幾不復

振其弟唐定奎忠勤勇敢素嫻紀律誓欲爲兄復仇臣令接統唐殿魁舊部上年冬間贛榆帶光之捷該軍殺賊最夥任賴等逆全股就殲固由將士用命亦係唐殿魁平時恩誼所感皆願出死力以償其畢生未竟之志其忠義正直耿耿滅賊之誠軍士每追念之無不流涕東掄已奏肅清該故提督積功最多死事最苦臣不敢不亟爲表揚可否仰懇

聖主逾格

恩施

特旨予諡並

敕於江蘇湖北及安徽原籍地方建立專祠所有銘軍歷年陣亡弁勇均准附祀其唐殿魁戰功及死事情狀並請

宣付史館立傳以廣忠勛而作士氣理合附片陳請伏乞

奏  
聖鑒訓示施行謹

行抵南宮擬由大名追擊摺同治七年三月初六日

奏爲官軍備賊南竄入豫臣督隊行抵南宮擬卽由大名前進相

機夾擊籌商布置恭摺仰祈

聖鑒事竊捻股南竄臣督軍由冀州前進於三月初一日馳報在

案次日督隊自景州啟行疊接郭松林楊鼎勳報稱方賊匪竄過

滹沱該軍馬隊渡河追及二十七日午刻賊以騎隊十數團直前

拒敵經吳鳳柱胡運發等開鎗迎擊相持兩時該逆三進三卻郭

松林楊鼎勳復飭胡良作湯得上尹長林陸懷邦夏青雲等合力

猛進躍馬入陣刀矛盪決賊乃潰走我軍乘勝追殺二十餘里調

集步隊蟬聯繼進仍馳三十餘里直抵趙州境內沿途斬獲共計

斃賊千餘名奪騾馬數百匹三十日馳抵南和聞賊已狂奔磁州

軍士飢疲已甚步不及騎徒爲焦急臣初四日行次冀州探聞該



逆已竄豫之臨漳本日抵南宮縣據各處探稟取賊過漳河後經  
豫院防軍迎擊獲勝仍向正南逃竄臣於正月二十八日督附片  
妄陳管見以懷慶衛輝北阻太行南偪黃河地形較狹各軍若進  
扼懷慶再派隊蹙之一隅比在直晉圍剿較得地勢昨左宗棠函  
商方略臣又將此議詳晰緘商去後但慮賊騎颯疾晝夜不停仍  
循舊路臣奔山西而太行各口如懷慶交界之天井關九里關濟  
源交界之風門口邵源關形勢雖險堵扼不嚴恐其交臂旋失頃  
准李鶴年來函亦以衛懷一帶依山阻河比之膠萊略似擬聯絡  
晉省慎守河防但非多兵莫辦等語是與臣等意見相同惟賊極  
猾悍亡命敗逃之餘見兵即走有騎如飛未知設法布置能否趕  
及懸慮殊深左宗棠及各省追軍均由磁州彰德循山兜進臣念  
大名與濮范滑滑毗連恐該逆勾引土匪傍衛河以東乘虛回竄

直境擬卽督軍由大名相機前進循河入豫之衛輝與左宗棠李鶴年等隨時籌商夾擊以期就地兜圍目下賊蹤愈遠直境稍鬆臣所部兵力尙單懇請

旨飭催官文迅飭潘鼎新善慶等各隊倍道南下俾資調派所有官軍偪賊南竄臣行抵南宮卽由大名前進相機夾擊籌商布置各緣由謹繕摺由驛六百里馳陳伏乞

皇太后

皇上聖鑒訓示謹

奏

白大名抵開州並滑縣獲勝摺同治七年三月十五日

奏爲微臣行抵大名後探聞賊山豫境被擊東竄趕督所部分路  
攔剿郭松林楊鼎勳在滑縣東北抄截賊前大獲勝仗臣進抵開  
州接應偪賊南趨恭摺仰祈

聖鑒事竊臣督軍山南宮進大名於初六日馳報在案初十日行

抵大名旋據各處探稟賊由衛輝新鄉一帶西竄獲嘉修武等處  
經豫軍扼剿折而東趨原武陽武初十日已過延津而北漸近直  
東交界臣飛飭郭松林楊鼎勳由彰德赴滑縣相機攔擊臣督隊  
由大名前進迫行抵南樂縣探知該逆由滑縣東南向東北奔竄  
擾及直隸開州邊境臣卽由清豐馳赴開州以備迎頭扼剿適郭  
松林楊鼎勳十二日先抵滑縣城西劉松山郭寶昌張曜宋慶等  
軍均在賊後緊追郭松林等慮該逆被追急竄入直是夜三更後

銜枚急趨折經濟境繞出東北一爲攔擊之師一爲橫截之計行四十餘里次於大邳山天甫近曙有賊馬數十團由東南直竄向北不虞我軍之繞截而前也郭松林自率胡良作馬隊飛騎衝入易用剛吳鳳柱分督各營排列疾進賊隊初甚整備猝遇我軍鎗矛相接衝突逾時尙敢拚死抵拒吳鳳柱易用剛等戰久愈奮躍馬陷陣弁勇繼進當者輒靡蔡國祥宋德鴻李長樂陳飛熊等亦各帶步軍乘勝盪擊賊屍枕藉田隴幾爲之滿賊中有悍酋執旗揮刀督眾返鬪經鎗子擊傷墜馬餘賊敗走愈急楊鼎勳督隊由大邳山左橫出截擊賊又悉銳來爭經胡連發徐邦道猛擊敗之高占彪吳雲集等帶隊接應該逆下馬迎戰長矛撥刺有聲約歷雨時之久楊鼎勳督步隊排放連環鎗礮傷斃甚眾賊勢大潰郭松林楊鼎勳合力猛追四十餘里劉松山張曜等軍復由東南節

節兜勦賊眾驚亂徑向西南奔突是日郭松林等生擒悍目常虎  
兒張裕寬朱元青李玉名等十數名並老賊數百名其餘陣前斬  
殺無數奪獲騾馬千餘匹實足寒賊膽而振軍威臣甫至開州派  
隊向西南搜捕策應賊已回竄延津封邱一帶飭郭松林楊鼎勳  
乘勝猛追會合各軍竭力勦辦以冀早就殲除惟該逆窮蹙之餘  
避兵亂竄此次本欲乘虛由開州走大名東昌以圖北擾不料臣  
軍趕至截擊又負創南趨而衛輝懷慶以西地形漸狹各軍兜逐  
兵勢雖盛而賊蹤極狡若難就地殲滅必仍折而北趨查由豫入  
直分東西兩路由淇縣湯陰赴彰德爲西大道由延津滑潞赴開  
州大名爲東大道左宗棠由彰德進正當西路臣由開州進正當  
東路目下賊情未定臣暫紮開州相機督飭進剿仍兼顧東北一  
面其十三日力戰陣亡之記名總兵胡家讓副將銜參將夏得勝

游擊周得意羅清瑞等四員應請

旨飭部從優議卹以慰忠魂所有郭松林等軍在滑縣攔截大獲

勝仗

臣進抵開州接應偏賊南趨各緣由謹繕摺由驛馳陳伏乞

皇太后

皇上聖鑒訓示謹

奏

賊向東竄與左宗棠商夾擊摺

同治七年三月二十四日

奏為各軍連日兜剿緊急賊蹤向東竄走商籌辦理情形恭摺仰

祈

聖鑒事竊臣行次開州業將郭松林等剿獲勝信賊南趨於十  
五日馳陳在案郭松林楊鼎勳十四五日會同劉松山張曜宋慶  
等追至衛輝沿途疊獲小勝賊不戀戰向西南竄走十六日賊忽  
由衛南折竄東北盤旋延津封邱一帶郭松林楊鼎勳繞赴滑縣  
迎剿適潘鼎新善慶溫德勒克西亦由內黃至滑諸將會議以自  
滑縣至長垣地勢平曠賊騎慄獍此擊彼竄無可攔制欲就衛河  
以西黃河以東聯營排紮先扼竄路再圖進剿請臣緘商左宗棠  
李鶴年合力籌辦等語正在商籌間布置未定賊已突至十九日  
賊由封邱北趨長垣潘鼎新趕往阻遏賊又乘夜折竄滑境二十

日黎明該逆全力死衝楊鼎勦當派徐邦道胡連發馬隊迎擊縱橫盪決擒斬數十名賊退數里忽又率眾回犯步賊皆下馬持矛結數十團奮臂直前而以馬賊分兩翼包抄我後胡連發左膀被矛傷猶裹創力戰楊鼎勦復率高占彪吳雲集唐宏成等接應連開鎗礮鏖戰兩時該逆且卻且前拚死猛撲吳雲集大呼陷陣手刃悍酋數名收向東北竄走郭松林分紮長滑之交是日辰刻聞賊由滑南突竄起督所部馳往策應臣亦自開州添派唐仁廉陳振邦馬勇赴滑協勦行至大河村遇賊唐仁廉首先衝陣斃賊多名賊騎兩邊抄下陳振邦繼進斬悍賊二十餘名賊始卻退未幾逆股全數回撲陳振邦鼓勇猛進奪馬三十餘匹賊以悍騎合力死鬪四面包裏陳振邦衝入賊陣腰中鎗傷喉頸復被矛傷正危急聞郭松林督隊趕至隨飭宋德鴻陳飛熊李長樂等步隊橫矛



持鎗縱橫擊刺賊眾紛紛落馬易川剛吳鳳柱各縱騎從旁抄殺該逆負創如飛竄去潘鼎新善慶等旋自長垣追至與郭松林楊鼎勳會合疾追是日同抵潛縣賊由潛縣內黃交界圍渡衛河二十一日潘鼎新善慶等擊走之臣復派周盛傳吳長慶等由開州帶隊截勦二十二日行抵內黃之七級見賊馬由西南向東北卽率所部攔頭迎擊賊騎拚力來撲我軍步隊一擁而進炸礮火箭連環轟擊賊立敗退馬隊乘勢抄擊賊向東路竄去生擒賊目許善王坤杜秋等十數名賊沿河竄往內黃潘鼎新善慶溫德勒克西追過城北二十餘里二十三日潘鼎新郭松林等恐賊繞由大名偷渡仍循衛河以南兼程緊躡使其不得喘息周盛傳吳長慶等由清豐南樂向東分路兜擊沿途接仗屢勝容再詳細續奏臣正慮大名空虛賊在衛河東南臣軍與之兜逐難退舍而北去幸

河水尚深左宗棠已督隊由湯陰楚旺沿河東下二十三日可抵大名與臣商約臣軍在衛河南岸追勦左宗棠督軍在衛河北岸夾擊使賊不得徑渡庶畿疆可資遮護賊勢亦有所牽綴該逆全係騎隊飄忽善走屢獲賊供因懷衛一帶阻山面河地勢過狹恐被圍困故亟出險肆竄但冀不過衛運兩河仍不出東豫數郡之地或可徐圖收拾臣惟隨時會商左宗棠相機妥辦並密屬郭松林潘鼎新等若賊乘閒渡河我軍須設法繞出其前以顧北面記名提督陳振邦向隨劉銘傳勦滅任賴捻股驍勇最著積功最多頃甫調令帶所部馬勇千餘赴前敵助勦奮不顧身受傷沉重旋即殞命實堪痛惜擬請

旨敕部將該員照提督陣亡例從優議卹以慰忠魂同日陣亡之仁營馬隊總兵銜副將劉正同游擊銜都司魯朝斌銘營馬隊守

備高峻嶺均請

敕部照例議卹所有各軍連日兜剿緊急賊蹤向東竄走現籌辦  
理情形謹繕摺由驛六百里馳陳伏乞

皇太后

皇上聖鑒訓示謹

奏

東昌追剿獲勝摺

同治七年三月三十日

奏爲捻逆折趨東昌各軍追剿獲勝情形恭摺具陳仰祈  
聖鑒事竊賊蹤向東竄走督軍兜剿業於二十四日馳報在案賊  
初欲循衛河北竄二十二日正在內黃之五龍口試淺偷渡善慶  
溫德勒克西馬隊馳及賊見步軍尙遠遂揮馬賊數十團散轡齊  
上猛力迎戰並分股繞出陣後層密包裹愈戰愈緊善慶等各率  
部分拒頗有斬獲潘鼎新郭松林等督馬隊馳援而令武毅勳鼎  
各步隊接應善慶溫德勒克西知有援軍從圍中突出夾擊賊氣  
盡奪降其偽天將熊大海騎賊百餘人賊潰遁東北二十三日賊  
竄南樂清豐之交周盛傳吳長慶帶隊趕至在陶保村外擊斃馬  
賊數十名奪驟馬百餘匹生擒賊目徐老滑等數十名隨即就地  
正法又追二十餘里至南樂縣東遇賊大隊回撲周盛傳率馬隊

迎勦賊騎萬餘合力壓下周盛傳當將馬隊撤回依附步隊進戰  
 賊見我軍馬步齊上悍賊數千下馬持矛蜂擁死鬪經營官賈起  
 勝衛汝貴汪炳炎葉志超楊岐珍馬朝選等奮勇迎敵鎗擊矛刺  
 連戰十餘回合賊勢稍卻馬朝選身受矛傷數處宋冠軍復帶開  
 花劈山礮連環轟擊自未至申廩戰兩時之久賊大潰走我軍乘  
 勝掩殺屍橫田野計斃悍賊千餘名當接仗正酣時該逆分二千  
 餘騎抄吳長慶各營之後立飭黃仕林者貴等分路擊走之又斃  
 賊目張丑等數十名賊連夜遁往山東莘縣境內潘鼎新郭松林  
 楊鼎勳善慶等恐其乘隙渡衛是日循河岸追至莘冠交界二十  
 五日賊卽直奔東昌前股已由東昌城南十餘里李海務一帶渡  
 運東趨我軍於午後追及郭松林善慶溫德勒克西縱騎疾上該  
 逆率悍黨迎戰易用剛尖鳳柱排整進擊賊屢衝不動徐邦道胡

運發吉玉成各馬隊從旁抄截步軍齊進陣擒悍目何士喜周久  
等數名殺斃老捻數百名各軍在東昌略購行糧仍圖繞出賊前  
向南壓剿此各軍連日追剿獲勝之詳細情形也臣查賊勢雖甚  
窮蹙惟步賊悉改爲騎日馳百數十里官軍追急常苦尋戰不得  
偶一接仗其悍賊又多下馬拒敵我軍須馬步並進方可制勝步  
隊晝夜飢驅齊形疲乏東直交界平曠千里逆騎任意盤旋無險  
可扼殊爲焦慮左宗棠現督劉松山張曜宋慶程文炳各軍由大  
名循衛河東北游擊以堵北竄臣亦飭郭松林楊鼎勳潘鼎新等  
會合東軍繞由北路向東南兜剿臣拜摺後卽日啟行進駐東昌  
一帶就近相機調派仍隨時會商左宗棠等妥籌酌辦其力戰陣  
亡之副管委參領卽補協領常通阿委防禦舒勒恆候選訓導陳  
兆榮擬保副將嚴鴻猷均請

旨敕部從優議卹以慰忠魂所有擒逆折趨東昌各軍追剿獲勝  
情形理合繕摺由驛馳陳伏乞

皇太后

皇上聖鑒訓示謹

奏

追賊北上附陳籌畫情形摺

同治七年四月初八日

奏爲

微臣

行抵東昌探知賊竄東北駿及津郡臣所派各軍節節

抄前攔剿

臣卽遵

旨北上相機調度並附陳籌畫情形恭摺仰祈

聖鑒事竊捻逆折趨東昌各軍追剿疊勝臣由開州繼進東郡各

情於三月三十日馳陳在案先因賊騎颯疾恐入東後逕奔東北

密飭郭松林楊鼎勳潘鼎新等倍道急馳務繞由北路沿運河南

岸儘力兜截但使賊不得渡運北趨庶可援護津門屏蔽畿輔郭

松林楊鼎勳潘鼎新善慶等深知緩急雖值連日陰雨久役飢疲

激厲軍心晝夜趨進昨據潘鼎新善慶等稟報二十七八日在在

平高唐等處追逐屢獲勝仗二十九日追過平原三十日繞至吳

橋日行百數十里節節抄前攔剿惟地勢平曠西擊東奔祇有兼



程緊躡以冀會合津郡及各路追軍設法牽制遏其竄渡以維大局等語臣冒雨趨行初六日至東昌探聞該逆已竄滄州南皮境內距津不遠臣所派郭楊潘善各軍均當追及左宗棠督劉松山張曜宋慶程文炳等初五日已由德州進景州以北計北路兵力已厚足資堵遏臣深慮各軍趕到賊又折回南擾官軍奔命不遑轉瞬又落賊後正在緘商英翰請其督皖軍進駐臨清豫籌布扼臣卽暫駐東昌聯絡布置俟賊回竄就地迎擊欽奉四月初三日寄諭以定安等兵力單薄臣迅督諸軍馳赴吳橋一帶扼要駐紮以爲前敵諸軍調度目下賊勢駭駭非走臣雖派大枝勁旅剋期前驅心繫

京畿憂惶莫釋惟有避

行避行不遑顧及後路拜摺後卽督同周盛波吳長慶等營由東

自起程馳赴德州吳橋等處扼紮就近相機調派冀補救於萬一  
臣查捻逆久成流寇張總愚尤極狡猾頻年竄擾北地撈馬最多  
平原曠野瞬息百里我軍步隊與爲躡逐實苦不及近來軍行日  
至百餘里爲用兵十數年來之變格然軍士如此奮勉猶不能迅  
圖殄滅非力不能敵蓋勢不足制之也窮年累月飢走疲憊徒勞  
我師誠恐一旦潰蹶難支轉生意外之變臣不得已屢爲就地圍  
制之請於商左宗棠等擬設長圍以困之無如黃河以北平坦千  
里網羅難施由於地勢使然懷慶形勢最險賊竟不肯深入張逆  
鑿於任賴等股之覆轍一聞圍紮立即死力衝出亦不容我閒暇  
次第施工議者謂就運河一綫設防蹙之海東一隅較得地勢惟  
運河自天津至張秋黃河口計一千二百里內張秋至臨清二百  
四十里年年黃水倒灌淤成平陸尤費兵力約須十餘萬人方可

分布現計直東豫主客各軍僅及十萬臣慮其有守無戰潰決爲患左宗棠慮局勢疏廓難於有成皆係實情或又謂待賊回竄豫境分守漳衛河及張秋至臨清運隄以蹙之費兵亦近十萬又恐偏賊入晉總之困局不得猝成賊騎難禁紛竄卽嚴督諸軍日以追勦爲事能勝賊而未足以滅賊久且有疲師覆軍之憂可勝惴惴微臣智術短淺於事勢之難略有所見不敢不據實質陳謹繕摺由驛馳奏伏乞

皇太后

皇上聖鑒訓示謹

奏

由東境轉戰入直沿途疊勝摺

同治七年四月十二日

奏爲郭松林楊鼎勳潘鼎新善慶等馬步各軍由東境轉戰入直  
沿途疊獲勝仗急援天津備賊南趨恭摺仰祈

聖鑒事竊臣派軍追剿竝經馳報在案三月二十七日郭松林楊

鼎勳潘鼎新等督軍由東昌冒雨進躡二十八日探賊山莊平東

轉向西北騎賊數十團隱伏樹林間郭松林飭王平西蔡國祥宋

德鴻李長樂等步隊上前轟擊賊馬卽退列村外潘鼎新督戴春

林吳從發潘國揚各營楊鼎勳督高占彪吳雲集唐宏成各營從

旁抄擊郭松林復調集各部馬隊與善慶溫德勒克西騎兵繞前

接戰值步軍挫賊之後銳氣益奮飛馬馳突不及一時逆陣果爲

衝動退越數村我軍馬步乘勝合追三十餘里至高唐州之雲家

村陣斬悍黨極眾生擒擒目賈託張有得二名老擒數十名追至

徒駭河邊該逆倉皇擁奔楊鼎勳擒獲擒馬甚夥二十九日追過平原賊向陵縣吳橋急走是夜四鼓各軍卽冒雨前進行未三十里與賊相值善慶溫德勒克西唐仁廉及武毅川勳各馬隊團結排列蜂擁而上賊騎以長矛回鬪都司邸得功陷陣死之步軍各營趕爲接應糜戰逾時擒殺多賊潰而北走擒賊供稱欲循吳橋就安陵連鎮兩處渡運郭松林等會商繞出賊前攔其搶渡之路是晚我軍逕抵吳橋賊乃自北迤東而走四月初一日大雨如注竊獲賊供仍欲由東光偷渡各軍循河急趨午後及之賊復回余家莊初二日賊又從東光境內突犯連濱我軍排壓倒擊賊敗竄南皮是夜賊酋鄧保正率二百餘騎來降初三日潘鼎新商催各軍以賊旣銳意北竄必須繞前抄截雖積霖泥淖軍士怨苦不遑深卹遂循運河東岸徑指滄州賊尙阻雨城南適東軍王心安落

後遇賊求援潘鼎新楊鼎勳兩軍先從左右兩路包裹而進郭松林督所部合之善慶溫德勒克西唐仁廉直從中路壓下賊騎橫列數十起已整備拒敵郭松林令馬隊屢爲前卻誘之使近步軍始放連環鎗礮閉以長矛攢刺該逆人馬中傷勢漸不支鼎勳兩軍分投抄擊賊乃大潰奪路東走夜間仍折而非我軍亦躡擊之次於滄州之花園連奪城館數處收降張懷慶胡志等數百人初四日賊竄靜海我軍追由唐官屯官兩屯以至陳官屯楊鼎勳乘夜襲擊賊目何祿誠等率七百餘騎來降初五日賊竄近天津二十餘里郭松林等趕行數十里沿途截戰倂賊自北轉向東南我軍傍晚到津分駐郡外探賊尙在楊柳青地方伐木結陣潘鼎新派張景春戴春林會同善慶溫德勒克西擊走之擬在津門稍辦軍糧再行相機壓剿據該統領等稟報前來查捻逆屢爲追師所

挫猶欲拚死渡運以圖一逞郭松林等自去秋馳逐至今將士疲  
憊已極因賊蹤沿運北犯各路官軍多未趕及晝夜冒雨苦戰力  
追泥途飢走勞乏萬狀倖能攔截賊頭援護津郡實足伐逆謀而  
固大局惟沿運上下未駐防兵雖雨後河水較深難保不循運回  
竄乘閒窺渡左宗棠已令劉松山張曜宋慶喜呂春壽各軍由東  
光南皮循運西節節截勦聞丁寶楨亦督軍由運西繼進德州以  
下正形空虛臣本日督隊至德扼要暫駐偵察賊蹤再相機分派  
截勦其郭松林營內連日力戰陣亡之總兵銜副將郭文武例貢  
生擬保縣主簿郭士琳擬保副將姚長庚游擊曾文益都司邱得  
功均請

旨敕部從優議卹所有郭松林等軍轉戰入直沿途疊勝急援天  
津偪賊南趨各緣由謹摺由驛馳陳伏乞

皇太后

皇上聖鑒訓示謹

奏



賊竄西南籌商布置情形摺

同治七年四月十七日

奏爲湘豫各軍追剿賊已回竄西南籌商布置情形恭摺仰祈  
聖鑒事竊臣於十二日行抵德州堵扼北竄當經專疏馳報其時  
探賊已由鹽山慶雲竄海豐一帶撫臣丁寶楨帶隊由交河回德  
晤商僉以賊勢回奔自臨清東昌至張秋運河淤澗已久賊所必  
經非重兵不能設防時日太促賊蹤逼近亦非倉猝所能施工丁  
寶楨與臣隨身人數無多既須扼勦北路又欲兼顧西防實屬力  
有未逮相顧躊躇適福建提督郭松林統帶所部由靜海滄州追  
賊沿運南下道經德州臣卽商令該提督與吳長慶親兵各營會  
合丁寶楨東軍馳赴東昌一帶相機布扼十五日各軍拔隊由恩  
縣南進據探報捻逆已於是日由禹城往平回竄高唐州境郭松  
林等十六日至高唐當有戰事卽抄出東昌寶恐趕辦不及連接

劉松山張曜稟報渡河迨往鹽山初十日接仗獲勝十一日賊奔海豐陽信十二日至武定十三日至商河沿途疊戰擒斬頗眾訊賊供張總愚以官軍均信運東現仍圖由水淺處急竄運西等語除劉松山等戰狀由左宗棠陳奏外臣查張秋至臨清運河二百四十里年年黃水倒灌淤成平陸設防最難費兵最多已於四月初八日摺內詳奏在案前由東昌循河岸北行親見人馬可涉迨至德州察勘北運河水勢數日之間陡長至一丈五六尺由於漳衛上游山水暴發而黃河桃汛尙未盛漲臣雖先委員弁在張秋河口挑濬淤沙意欲引黃入運以困賊然黃水僅高尺餘未便啟壩須待伏秋大汛運河方可灌滿此時設防則全恃兵力未能以水爲險議者皆謂賊在東境蹙之河海一隅可圖聚殲臣等身在行間豈有不竭力籌辦之理但直東交界縱橫平曠七八百里

賊騎飄忽無從固制欲趁東海南河形勢必須先扼西北運河聯築長牆絕其出路而尤以東至天津沽西至東昌張秋為兩頭鎖鑰天津為

京師門戶通商重地誠如崇厚初八日奏內所稱須籌畫萬全不敢輕於嘗試臣正在講求簡捷之法郭松林潘鼎新昨過滄州慮賊回撲津郡因見運河盛漲督率弁勇將滄州迪南捷地壩掘開內有減河一道橫通海濱牧豬港約百餘里運水立時灌入深可四五尺潘鼎新已飭該地方官就河東集練築牆若守住減河既斷竄津之路兼為滄青靜海屏蔽臣令潘鼎新楊鼎勳等暫行察度布置並緘商崇厚派兵接防設法築壩淤蓄水使深以為津畿外戶惟重兵均在前路東昌一帶空虛無備賊必乘虛回擾臣初八日摺內亦略及之昨准安徽撫臣英翰函稱十四五日可至

東郡當能與郭松林各軍關頭一擊但地面寬平河牆未立難保其不繞由上下水淺處竄越而西應請

旨飛飭河南撫臣嚴防內黃滑濟一帶並

敕下直隸督臣轉飭大順廣道將衛河南岸船隻盡行提歸北岸豫爲之備賊現尙在運東丁寶楨郭松林等折往東昌設竟與英翰會師堵截賊又折而北竄德州爲北路衝要距賊甚近臣暫帶周盛傳數營駐扼此間偵視賊情再籌調度所有賊蹤回竄西南籌商布置情形謹繕摺由驛六百里馳陳伏祈

皇太后

皇上聖鑒訓示謹

奏

賊趨東北官軍分投兜剿  
同治七年四月二十三日

奏爲捻逆折趨東北官軍分投兜剿恭摺仰祈

聖鑒事竊張捻由禹城平原回竄高唐籌商布置情形經臣於十七日馳報在案旋接郭松林十六日稟稱該提督會同吳長慶帶隊行抵博平縣城北探賊大隊又自南折而東趨郭松林率馬隊及親兵步隊追及賊騎散轡急遁小有斬獲訊供賊圖竄運不逞復竄而北該提督仍趕赴東昌會合東皖各軍築牆憑河設守以杜竄越等語又疊據劉松山張曜宋慶等稟稱十五日會同春壽喜昇馬隊追抵高唐恐賊窺渡運西十六日偪之博平以東賊突由桂平折竄東北剽疾異常十八日躡及平原迤東賊又狂竄該提督等以逆眾絕不及拒無從痛剿仍乘夜襲之是晚銜枚疾走五十餘里始見匪蹤各軍排進立破馬家集任家集李家樓各村

馬賊多住村外四散狂奔我軍復馳逐十餘里擒賊二百餘名十  
九日賊竄陵縣德平等處二十日追往南津境內該逆尾隊橫出  
拒敵我軍分投猛壓賊卽收遁追二十餘里擒殺甚多兩大始行  
收隊逆股復向東北狂奔各等語該逆前竄天津未遂又乘我軍  
南下折而北趨不知滄州捷地壩已開滅河漕水通海尙有潘鼎  
新楊鼎勳兩軍在彼扼堵也昨接潘鼎新稟稱滅河東岸已修築  
長牆八十餘里水深丈許足資守禦臣飭該藩司與楊鼎勳妥籌  
防剿必不任其竄過並密屬劉松山張曜等沿途緊追勿任喘息  
偷渡左宗棠已督程文炳等軍由吳橋南津赴南皮一帶沿運河  
東岸扼剿臣料該逆知滄州滅河有備南皮東光沿運又有游兵  
必卽折而南走仍由鹽山樂陵回竄臣所部潘鼎新楊鼎勳旣在  
滄州以北郭松林吳長慶又往東昌以南兩處皆緊要關鍵賊所

必經之路臣僅帶周盛傳一軍駐扼德州咽喉偵察賊蹤相機截  
勦就現在局勢而論英翰丁寶楨已抵東昌西路運防可期嚴密  
滄州滅河牆濠既固津郡亦無他虞惟自滄州至臨清河道六百  
餘里現雖水深丈餘久晴必漸消涸河西一帶毗連畿輔專恃民  
團捍衛臣實不敢放心各省兵將除前敵追勦及分防東西要地  
外似已無可抽調若抽調太多則又無大枝兜勦之兵盛奉  
寄諭以直省沿運防務責成左宗棠官文崇厚安商布置但運防  
未穩進勦仍不宜過急致有鋌而走險之虞臣尤不得不鯁鯁  
慮謹據實由驛馳陳伏乞

皇太后

皇上聖鑒訓示謹

奏

覆奏催飭劉銘傳北上片

同治七年四月二十三日

再欽奉四月十七二十等日

寄諭以劉銘傳三月假期已滿飭催督率所部迅赴北路剿賊仰

見

聖主愛情將材訓勵交至欽感莫名竊查劉銘傳與臣生同鄉里少負不羈之材血性忠勇智略明達近時武將中實所罕見蘇省肅清非臣之功劉銘傳與程學啟之功爲多任賴捻股蔓延數省倖而殄滅亦非臣之功劉銘傳一人之功也追逐三年疲憊實甚五年冬臣初至徐州督師劉銘傳晤稱必欲速了此賊以求開缺歸農臣當時望其成功許以事竣代奏去冬任柱授首後劉銘傳疊次手書堅申前請是以臣曾附片奏過一次明知時事多艱將材難得臣向於部將然諾不欺未忍強偏也迨東捻全股撲滅劉



銘傳扶病來濟甯相見乞退更切其時適西捻出竄將及河朔

奉

諭旨令該提督統兵協剿該提督久勞致病腿腫不能乘騎係屬  
實情臣不敢遽為代請開缺但請假三月俾得靜心調養並將所  
部銘軍委該軍營務處道員丁壽昌暫行代理駐防邳州認真操  
練以待劉銘傳假滿視師自臣撥直後劉銘傳回籍就醫久無來  
信未知其腿疾果否全愈三月間臣因捻勢日熾生獲賊供賊中  
恐劉銘傳復出時時探問臣已兩次手書專弁赴劉銘傳處諄催  
來營襄助聞督臣曾國藩亦為懇切而催茲疊奉

恩諭又經恭錄檄行去後惟恐驛遞梗阻該提督或藉病遷延致  
誤師期劉銘傳於捨情地勢最為熟悉湘淮皖豫各統將素皆心  
折微臣文弱辦賊之才自愧弗如可否仰蒙

恩旨令劉銘傳總統前敵馬步各軍

飛飭兩江督臣曾國藩署安徽撫臣吳坤修就近催令迅速統軍北上與臣等其籌滅賊之方該提督啟行時如須添募兵馬添製器械等件並請

飭曾國藩籌款助給俾無掣肘該提督通習書史素明大義諒無不急難赴公白干清議是否有當伏乞

聖鑒訓示謹附片具  
奏

馳往滄州仍回德州調度摺

同治七年閏四月初二日

奏爲各軍堵剿獲勝情形臣馳往滄州北路察勘一切仍回德州

會籌調度恭摺仰祈

聖鑒事竊前次賊蹤北趨臣料其必由滄州減河折回於四月二

十三日馳奏後臣卽督周盛傳行隊於二十四日由德州沿運河

東岸北行察勘形勢並擬賊若沿運回竄就近截擊是日行次東

光之連鎮據潘鼎新楊鼎勳善慶等稟稱二十一日戌刻捻眾

突至減河南岸盤踞各村三鼓時直撲河牆善慶溫德勒克西暨

吉玉成徐邦道等嚴堵橋口潘鼎新起派張景春潘國揚等馳往

援勦楊鼎勳亦派隊由白兔過河兜擊二十二日卯時賊因防兵

嚴整屢撲不動卽收竄鹽山一路等語是日午後左宗棠亦督軍

追至河邊劉松山張曜宋慶等遇賊回竄在舊滄州獲一小勝均

經左宗棠馳報臣二十五日馳抵南皮探聞賊已掠樂陵而西二十六七等日臣卽往滄州捷地巡視河牆晤商善慶潘鼎新楊鼎勳等察看減河上游水勢尙旺惟下游呂橋東至海口數十里河身淤塞一片漫灘可由鹽山小徑抄入潘鼎新楊鼎勳等親督弁勇逐節挑濬以期引水入海淹沒此路使該逆無隙可乘臣飭各營妥速布置俟防務穩固潘鼎新仍抽隊出勦暫留楊鼎勳駐守一面緘商崇厚請酌添津軍赴減河分段協守蓋守住滄州減河則天津萬無一失無須多兵駐防且不可使臣處游擊勁旅盡改作守兵也臣卽於二十八日督隊南下二十九日行次德州之桑園與左宗棠函約在此相會面籌堵勦機宜意見均合並無畛域堪以仰慰

聖慮閏四月初一日回駐德州偵知賊已由高唐西走夏津闕撲

臨清東昌運河先准丁寶楨英翰郭松林函稱四月十九日東皖  
淮軍議分段落淮軍郭松林吳長慶等自東昌城南守至張秋河  
口東皖各營自東昌以北分守至臨清上下剋期趕築長牆惟河  
水淺澗可慮臣先遴派水師提督徐道奎張秋轉運局員萬年清  
統帶樹字營張樹屏在張秋督勇挑濬淤河已報完工適黃水驟  
漲三尺二十二日夜徐道奎等趕督勇夫開壩引黃漕運以裨防  
守並調楚軍丁長春水師由張秋臨清駛入德州運河臣抵德時  
丁長春礮船亦至面詢臨清以上河牆大致堅厚閘河水勢深淺  
不等其淤淺處亦有水三四尺將來伏汛盛漲無難引水灌賊日  
來南路文報梗阻竊料東昌上下河防有牆有水又有重兵逆騎  
必難飛越據各縣探稟賊擾及東昌不得渡運又從高唐平原回  
竄二十九日已至禹城固河楊圈一帶閏月初一日向臨邑沙河

莊狂奔仍圖北犯等語左宗棠已飭劉松山張曜宋慶喜昌眷壽相機兜擊臣過桑園商令程文炳迅帶所部前往與皖軍郭連昌牛師韓等合隊迎勦臣抵德州後又令周盛波周盛傳帶馬步親軍馳往陵縣一帶相機攔勦除俟各軍續有戰狀再行馳陳外至劉松山張曜宋慶等二十五日追至臨邑獲勝郭運昌牛師韓二十六日在恩縣東南接仗獲勝情形左宗棠英翰必已詳細奏報矣所有各軍堵勦獲勝臣馳往滄州察勘仍回德州派隊截勦各緣由謹摺由驛馳陳伏乞

皇太后

皇上聖鑒訓示謹

奏

各軍兜剿獲勝摺

同治七年閏四月十一日

奏爲連日各軍兜剿獲勝情形恭摺仰祈

聖鑒事竊賊竄東北派隊堵剿各情臣於初二日馳報在案是日

周盛波帶銘營先鋒馬隊周盛傳帶盛軍步隊由德州赴陵縣截

剿夜見賊火在臨邑陵縣之交初三日周盛波等由陵縣東進二

十里至鳳凰店卽遇賊馬往來游駛其大股尙在五里以外我軍

馬步結陣齊進擣其中堅賊眾突見官軍大驚逸走當令馬隊躡

之沿途擒賊三十餘名獲馬六十餘匹奪回賊踞村莊二十餘處

追至何家莊張逆突驅馬賊大股結十餘團回撲我軍亦排陣迎

之正欲交鋒賊見官軍馬步並進旋又回竄大股直向東路絕勒

而馳並有賊騎分路折竄劉松山張曜宋慶程文炳各軍亦已追

及據擒賊供稱該逆欲將官兵誘至東路海隅遂疾竄西北圖撲

運河等語劉松山張曜宋慶等於初四日橫出德平邀擊大勝擒斬數百人該逆由東北敗向正東初五日劉松山張曜等跟蹤急追周盛波周盛傳慮賊回撲運防改由甯津向吳橋西南截擊兼爲德州屏蔽初六日賊過海豐東北四十里忽折向西北劉松山宋慶張曜在慶雲東遇賊來撲鏖戰半時擒斬二百餘名初七日追過鹽山滄州交界是夜四鼓擒酋高老步韓錦生率四百餘人赴劉松山營乞降又有周老鳳率七十餘人赴張曜營乞降均經分別遣留降酋俱張逆傳令各帶門板繩索欲向東光下口一帶搶撲運河適先派水師總兵丁長春赴下游巡防是日帶礮船駛抵下口初八日午刻劉松山張曜等又追及下口迤東該逆正在搬運板片箱櫃等件水陸各營分投截勦逆眾狂奔繞東光城而走有馬賊數十竄至馬頭河邊丁長春趕督礮船前來轟擊劉



松山張曜宋慶程文炳等均循河東追殺沿途頗有擒斬該逆向西南奔竄仍欲由連鎮一帶搶渡左宗棠在吳橋聞信已於初七日督隊移駐連鎮河東臣由張秋調到提督徐道奎水師初六日飭由德州下駛初七日已刻亦抵連鎮該逆偵知有備初九日纔由吳橋德州界內南走陵縣臣飭周盛波周盛傳率隊急追是日申刻及賊尾隊於陵縣西二十里之土橋賊以精騎二三千回拒周盛波督馬勇與之搏戰回合數次步隊趕到合力兜擊賊大潰奔擒殺百餘人奪賊馬二百餘騎聞侍衛陳國瑞是日亦帶所部由恩縣至陵縣截剿獲勝初十日據探賊已向西南平原高唐一帶竄走臣飭周盛波等乘勝跟追相機兜截劉松山張曜宋慶程文炳均帶隊過德並令分路躡進賊趨西南我軍仍須傍連東節節牽制現在該逆無一步隊每人攜有三二騎替換避兵急走忽

東忽西多方誤我遇官軍步隊攔頭或追及一瞥便已突過絕不戀戰遇馬隊則我馬不敵賊馬之多又未可單進浪戰致有蹉跌故馬隊須與步隊相輔則亦不易追及逆情如此慄狩幸在運河以東一隅之地稍有限制但冀上下游運防加嚴游擊各軍再沿運兜追先使不得竄渡庶期辦漸有歸宿所有各軍連日兜剿獲勝情形謹繕摺由驛六百里馳陳伏乞

皇太后

皇上聖鑒訓示謹

奏

兜勦獲勝並布置大略摺

同治七年閏四月二十日

奏爲各軍連日兜勦獲勝並布置調派大略恭摺仰祈

聖鑒事竊初十日以前勦辦情形經臣於十一日馳報在案該逆於十一日南竄高唐在平界內陳國瑞在天官廟抄出賊前率隊痛勦擒斬甚多礮斃悍首陳熊一名十二日東軍王正起等在往平夜戰大勝擄獲騾馬無數張曜宋慶適至夏津東南一帶攔頭扼截匪騎散漫徧野宋慶等突出猛擊大股倉皇折走生擒騎賊五十餘名奪馬百餘匹皖軍程文炳牛師韓等是日亦在高唐池西截擊疊有擒斬十三日陳國瑞遇賊於在平清平之交儘力勦洗賊不戀戰向東潰走十四五日以後又竄禹城平原一帶昨又由陵縣之南竄往臨邑據生擒賊供逆情竊迫時圖搶渡運河現在連旬晴燥張秋黃河口業已斷流東昌臨清開河淺涸殊甚東

皖淮軍聯紫牆濠布置甚嚴兵力較厚似尙無虞自臨清北至滄  
州運河上通衛河雖有來源日落水二三寸西岸直東民團齊集  
紫牆官文派臬司張樹聲道員歐陽正埔丁寶楨派候補道王成  
謙等分投督催臣又添派直東紳士道員李逢春裴德俊提督傅  
振邦前往會同聯絡督勸以冀剋期集事一律高厚昨因水淺賊  
近德州上下牆工間有斷缺之處潘鼎新帶隊由減河來德飭令  
先其所急拔往景州東岸分飭弁勇過河替修吳橋至景界長牆  
三十餘里又令周盛傳帶隊由四女寺過河替修故城至德州長  
牆五十餘里運西團勇見官軍通力合作爲保身家愈增踴躍旬  
日之間可期大致竣工有牆有水稍資堵禦惟河道過於縣長自  
連鎮北至滄州西岸有京營馬隊直省練軍協同民勇分段防守  
連鎮南至臨清數百里則專恃民團強弱不齊未盡可靠各省客

軍俱在前敵本難分撥且南勇性情口音與北人均不相習民團既不願與之雜處各軍亦不能全行替防臣等再四籌維祇有揀派各軍輪替出擊更番休息其久追疲乏須暫休息之軍卽在運河東岸擇要屯駐俟賊竄近立起迎擊以勦爲防左宗棠已派劉松山郭寶昌喜昌等軍口連鎮北至滄州減河東岸分紮與捷地楊鼎勳等軍就近策應臣亦飭派張曜宋慶分紮夏津高唐一帶程文炳紫陵縣吳橋一帶遇賊回竄整隊截擊兼爲運防遮護臣前因北運河寬深礮船可以得力咨商曾國藩飭調長江水師提督黃翼升督帶數營前來助防昨准曾國藩咨覆已令黃翼升統淮揚水師五營赴張秋候調日來黃水消落各礮船阻滯張秋不得進口殊爲焦急早晚若得大雨河水增漲礮船駛入分布運防當較有把握耳東昌以南前派郭松林往紫廟因進剿喫緊先令

道員丁壽昌帶銘軍北來替防但該處運河極涸水僅數寸仍虞地長兵單已咨商河南撫臣李鶴年將現守滑縣之提督馬德昭六營調往東昌以南與丁壽昌聯絡布守據報業經啟程郭松林昨已帶隊抵德臣令與潘鼎新善慶春壽溫德勒克西及侍衛陳國瑞等會合由陵縣前進覘賊所向併力痛剿以期早就殲除所有各軍連日兜剿獲勝並布置調派大略恭摺由驛馳

奏伏乞

皇太后

皇上聖鑒訓示謹

奏

張宋襲賊獲勝片同治七年閏四月二十日

再正繕摺開接據張曜宋慶稟稱十八日督隊追至臨邑縣境適該逆由東北折向西南奔竄時當薄暮相距約二十里當飭各營潛伏樹林宋慶親率劉廷蔣東才李承先等張曜親率賈蕙山胡書李永芳等選帶精銳銜枚疾進匪眾正在搶據村莊不虞我軍猝至也立經分投猛擊逆首張宗道張振江李瀕林率黨抗拒我軍奮力衝殺該匪敗歸村莊復經劉廷督率馬玉坤宋得勝等由左路進李永芳胡書等由右路進攻破賊踞村莊十餘處悍賊殺斃無遺張總愚仍率全股來援張曜宋慶督隊猛擊該逆且敗且走繼爲河溝所阻倉皇搶越我軍乘勢追壓賊大潰奔宋慶等督軍追殺二十餘里始行收隊生擒四百餘名斬馘約千餘名並獲賊酋聶瑣李瀕林二名擊散脅從甚眾奪騾馬三千餘匹洋鎗四

十餘桿器械輜重無數天明後逆眾方湊集一處向東北逃遁各營傷亡奮勇一百二十餘人等情前來臣查宋慶等軍最善夜戰近來賊情剽猾見兵卽走白晝追逐難得接仗晚間必離官軍數十里外圍聚露宿夜不解鞍偵知兵至亦卽狂遁宋慶等訓得其情於十五六日以後但緩追以懈之賊不防備乃乘夜猛進襲剿有此快捷足寒逆膽惟賊技愈窮圖竄愈速難保非引我軍追往東北忽折而西伺隙撲逆臣屬令張曜等俟郭松林等軍前進接追該軍卽暫回扼高唐夏津一帶待賊回竄卽行相機攔剿兼可遮護運防所有該軍此次戰勝尤爲出力將弁可否懇恩准卹查明存記彙案請獎以示鼓勵合將張曜宋慶十八夜襲期大獲勝仗情形附片馳陳伏乞

聖鑒訓示謹



奏

劉銘傳患病片

同治七年閏四月二十日

再欽奉十三日

寄諭劉銘傳計報起程著令迅赴前敵統帶各軍迅圖滅賊查臣  
自前次奏催劉銘傳來營正深盼望閏四月初七日始接該提督  
四月初九日函稱左腿瘡毒春開復發初起堅硬一塊不見紅腫  
日發潮熱遂赴六安州就醫連服托膿提頭等劑於四月初四日  
潰出膿血數碗疼痛異常昏迷數次飲食大減步履維艱請奏懇  
開缺展假調治等情頃又接准署安徽撫臣吳坤修閏四月初九  
日函開欽奉

傳諭當備咨函諄催又令六安州知州親往看問接劉銘傳函稱  
瘡已出頭尙未收口現在趕緊醫治以求速愈一俟瘡毒收口稍  
可步履卽力疾就道斷不敢有意遷延自外

生成並據六安州劉奎光稟稱瘡疾實未收口約計本月下旬或五月初旬漸愈當可遊行各等語並將來往信函鈔寄前來臣查劉銘傳素性直爽尤不慣以清閒自處聞其左腿瘡毒係名跨馬灘若未卽愈於戰陣馳驅固非所宜察其疊次兩牘情詞急迫並詢南中來弁尙非捏飾據柵瘡疾收口卽行就道爲期當不甚遠臣仍隨時檄催除俟到營後察酌具奏外現在運河圍局漸成逆情窘迫思慮如果雨水旺發師船並集在事諸將帥均以防務爲重使賊猛撲不過諸軍就地協力痛勦可冀殲除有期若各軍皆圖進剿不顧其後賊騎飄忽無定恐乘水淺之時空虛之處亡命衝突亦意中事此臣與左宗棠暨前敵諸將所日夜危心者理合附片陳明伏乞

聖鑒訓示謹

奏

袁保恆派全軍翼長片

同治七年閏四月二十日

再候補鴻臚寺少卿袁保恆奉

旨飭赴軍營交臣差遣該員於閏四月初五日抵營臣與朝夕接  
晤稔知其久歷戎行智勇俱優前敵各統將多其素識已檄派馬  
步全軍翼長聯絡諸軍妥籌防期理合附片具陳伏乞

聖鑒謹

奏

各軍兜剿獲勝摺

同治七年五月初二日

奏為擒逆竄往東北被擊回竄連日各軍兜剿獲勝情形恭摺仰  
祈

聖鑒事竊逆眾經張曜宋慶等軍擊敗竄向東北經臣於閏四月  
二十日馳奏在案旋據張曜宋慶稟稱十八夜收隊後搜獲髮賊  
十餘人內有楊見山一名供稱跟隨逆首偽淮王邱遠才多年是  
夜官軍攻破邱遠才住處邱逆不及騎馬帶同伊等逃跑甫出莊  
外半里鎗礮之下忽見邱遠才受傷倒地伊躲入路旁小廟復見  
官軍二人過去又將邱遠才扎了兩矛諒已身死等語查邱遠才  
係粵逆餘黨與賴汶洸同入捻夥去冬賴逆被擒曾供稱令邱遠  
才往陝甘勾結回匪張總愚與之狼狽為奸實為賊中巨擘若果  
伏誅足孤張逆之黨除飭候續獲賊匪訊證明確或尋獲該逆屍

身再行專案具奏外郭松林潘州新與陳國瑞合軍進剿二十一  
日行抵甯津探賊由樂陵向陽信信化一帶二十三日各軍追抵  
樂陵二十四日赴陽信離城二十餘里卽遇賊隊該逆不與接仗  
直由海豐竄向東北郭松林等跟擊之獲其尾股十餘人二十五  
日潘鼎新郭松林追出西北之大柏山以攔賊頭劉松山郭運昌  
亦各帶隊由南皮鹽山迎期行抵小山地方適遇賊由東向北劉  
松山等分路進抄賊驚聞官軍在北相率停住趕緊列隊劉松山  
郭運昌乘勢猛擊賊紛紛潰走追四五里張逆復糾眾回拒我軍  
酣戰半時斃賊甚夥賊仍向南收竄前面隔一小河賊已撲過郭  
松林潘鼎新大隊適至善慶溫德勒克西唐仁廉等馬隊分列兩  
翼蟬聯排進鎗礮刀矛並舉賊雖力抗逾時抵敵不住越河而遁  
郭松林等由後追殺二三十里生擒七十餘名斃賊約二三百名

奪獲騾馬三百餘匹劉松山郭運昌復山北而衝擊賊遂折向西  
奔我軍乘勝追殺老湘卓勝兩營計其斃賊數百名生擒二百餘  
名獲騾馬四百餘匹我軍亦有傷亡二十六日劉松山等追至鹽  
山城外頗有撿斬賊向西南狂奔陳國瑞追過樂陵二十七日黎  
明及賊接仗殺斃百餘名獲馬百餘匹營官陳文仲陣亡復遇各  
軍遂合追三十餘里至德平縣西二十八日各軍會追至臨邑城  
南賊由禹城向西南一帶奔竄皖軍程文炳牛師韓二十七日繞  
出平原縣南遇賊騎回竄當卽督隊迎勦斃賊數十名賊又向南  
敗走追十餘里營有撿獲據各統領稟報前來臣查賊情窮蹙之  
餘極爲狡猾恃其多騎善走避兵疾驅官軍步多騎少時值炎熱  
每苦追趕不及該逆欲乘虛北撲滅河不料劉松山郭運昌兩軍  
由北迎來郭松林潘鼎新陳國瑞由南追及迨經擊敗回竄由鹽



山橋全德平原之交日行百八十里我軍亦日行百三十里徒  
疲我師難得痛戰實深憤急據陳國瑞面稱該逆欲由荏平清平  
直撲臨清圖渡運河該侍衛二十九夜已帶隊由平原赴高唐相  
機迎擊臣又飛飭張曜宋慶由恩縣折往夏津一帶攔剿郭松林  
潘鼎新等由禹城一帶兜進冀收夾擊之效所有擒逆竄往東北  
被擊回竄各軍兜獲勝情形謹繕摺由驛馳陳伏乞

皇太后

皇上聖鑒訓示謹

奏

銘軍四案彙保摺

同治七年五月初二日

奏為劉銘傳馬步各營歷在山東曹縣湖北黃安紫坪鋪及東境安邱濰縣擊賊疊勝江蘇贛榆戰斃逆首在事出力員弁兵勇遵旨查明四案彙保仰祈

聖鑒事竊自五年九月任賴捻股復犯東蘇由梁山繞竄金魚豐浦回擾鉅鄆曹濟勢將南犯清淮東撲運河臣檄直隸提督劉銘傳山東布政使潘鼎新前廣西右江鎮總兵張樹珊等往來緊蹙自九月二十日以後先後收賊二十次十月二十六日曹縣孫老寨之戰生擒偽天將胡將燕義等賊酋數十名尤為大捷該逆由豫境歸德一帶狂竄已甚狼狽入湖北後賊欲復張六年三月臣奏調杭州副都統善慶所部馬隊歸併劉銘傳調度其時周盛波在應山戰捷賊仍由信陽回竄鄂中劉銘傳恐其乘虛由黃州下

賊安慶兼程馳抵紫潼河向北攔截四月十二日在紫坪鋪迎頭  
繞擊大勝賊遂不敢東犯乃由棗陽入豫連防不慎又由山東戴  
家廟過河膠萊不守又由濰河北口搶渡臣與劉銘傳等籌商調  
派扼守運河西岸遂得蹙賊於東蘇之交十月閒銘鼎兩軍追勦  
獲勝復於安邱濰縣盛戰賊逆股匪被創略盡十一月閒劉銘傳  
善慶馬步乘勝追至贛榆城南鎗斃首逆偽魯王任桂寶爲前此  
五省肅清之基所有在事出力員弁兵勇經臣四次奏奉

諭旨查明彙獎遵經恭錄轉行去後茲據劉銘傳詳查勞績分別  
等差先行開單請奏前來伏查以上諸戰績已具臣前後各疏中  
惟捻氛肆擾籌辦艱難劉銘傳所部數十營前後數百戰盡仗  
天威屢奏奇捷最爲得力查其隨營在事各員弁或帶隊截擊或  
冒險轉運以及官紳助勦民寨濟糧均屬異常出力臣逐加核減

分繕清單仰懇

天恩准照所請破格獎勵以資激勸除千總以下各弁及六品藍翎等項循案造冊咨部核辦外所有劉銘傳馬步各營歷在山東曹縣湖北紫坪鋪及東境安邱濰縣擊賊營勝江蘇蘆榆戰斃逆首之出力員弁四案彙保緣由謹繕摺由驛具

奏伏乞

皇太后

皇上聖鑒訓示謹

奏

議防馬頰河就地蹙剿摺

同治七年五月十五日

奏爲捻逆竄向東北各軍分投攔擊獲勝擬信令南趨再圖就地蹙剿恭摺仰祈

聖鑒事竊捻股於前月杪敗竄西南圖撲運防當經郭松林潘鼎新王心安等軍躡追在不境內由西迤南遁走各情臣與英翰丁寶楨等先後馳奏在案五月初四五以後天氣酷熱軍士追急疫病繁興臣飭郭松林潘鼎新等暫紮陵縣臨邑一帶適中之地伺賊竄近邀擊以逸待勞張曜宋慶駐軍恩縣夏津屏蔽西北運防休養旬日令卽趕緊拔赴東路輪替追剿初七八日賊由武定陽信海豐等處北趨劉松山郭運昌喜昌馬步各軍由東光向鹽山迎剿張曜宋慶由樂陵馳向正北春壽統所部馬隊由樂陵向東北前進十二日午後張曜宋慶行抵鹽山之盤村適與該逆相

值樹林叢密出其不意宋慶率副將劉廷參將蔣向鈞等由左路  
進張曜率總兵程之偉副將李永芳等由右路進恐先放鎗礮匪  
眾恃馬疾遁不能痛剿故皆捲旗猛入相距既近該匪盤踞村莊  
正在休息經各隊爭先進殺刀矛已及始令鎗礮連環施放逆眾  
登時驚亂人馬倉皇悍賊紛紛倒地兩軍奮殺追十餘里該逆始  
糾合大股回拒復經兩軍奮勇盪決匪勢不支向西南狂奔我軍  
緊追三十餘里天氣炎熱人馬困極始行停歇計生擒賊目李幼  
順韓耿二名長髮真捻一百三十餘名短髮髮者七百餘名礮斃  
斬賊甚夥並獲騾馬三百餘匹劉松山等聞亦於是日勦賊獲勝  
尙未報到該逆逕向西南敗竄張曜等恐其疾窺運河十三日會  
同劉松山均繞城西且攔且躡探聞甯津已有賊蹤飛飭提督  
吳長慶由桑園帶隊赴吳橋攔截郭松林由陵縣挑派馬步向東

兜擊該逆知西路有兵復向正南偏東往德平竄去是晚驚至臨  
邑城東北十餘里各村踞宿潘鼎新適駐臨邑急令步隊乘夜襲  
之二鼓後該逆酣睡我軍突入賊集鎗矛兼施下家廟各村踞賊  
悉數殲擒五鼓收隊查點各營奪獲騾馬六百餘匹據擒賊供稱  
張宗先一股殲除殆盡十四日潘鼎新仍出隊跟勦計可與張曜  
宋慶等會合商辦矣臣查該逆窮窘之餘尤極慄猾運東地勢平  
曠縱橫七八百里晷日追奔徒疲士卒尙難致賊死命且久晴之  
後運河日涸西岸民團協守未可深恃處處皆有鋌走之虞臣愚  
以爲宜趁黃河伏汛盛漲時縮地圍紮以運河爲外圈而就恩縣  
夏津高唐之馬頰河截長補短畫爲裏圈偏賊西南層層布置佔  
地較狹困賊較易收功或可較速諸將多持此議臣已商同丁寶  
楨檄飭恩夏清平各屬官紳號召民團就馬頰河西北岸聯築長

牆分派員弁前往督催日來漸次興築但未卜何時竣工又飭郭  
松林潘鼎新周盛波等各督弁勇由臨邑陵縣接築牆濠與馬頰  
河民圩接氣俟將來追賊過濟陽各軍合力圍築直至黃河北岸  
先困賊於西南一隅再行分隊輪替逐戰庶賊騎有所限制而剿  
辦稍有把握所慮賊情誦詐未肯深入各軍心力不齊趕辦不及  
耳所有官軍分投攔擊獲勝擬偏令南趨再圖就地蹙剿各緣由  
謹繕摺由驛馳陳伏乞

皇太后

皇上聖鑒訓示謹

奏



築馬頰河長牆片

同治七年五月十五日

再正繕摺開據潘鼎新馳報十四日卯刻會同副都統善慶溫德勒克西乘勝兜勦在臨邑東三十里地方截殺逾時斃賊甚多該逆向南竄去是日傍晚張曜宋慶亦督軍追至該藩司會商張曜等請由臨邑而南接續排紮先扼北竄之路再行輪營進擊張曜等以平地紮牆兵力不敷爲慮臣飭其相機妥辦或俟他軍追賊過臨會商協助又據張曜等稟稱獲賊僉供逆首張總愚因無路求生東北追軍過盛欲糾死黨由臨清以北故城以南乘虛窺渡運河請飭東皖各軍就地迎擊遮護各情臣查賊勢先趨東北各軍不得不往北面布置茲漸偏回西南又不得不就地圍紮冀扼北竄而制奔突雖兵力未齊而機勢可圖臣惟督同諸將竭力籌辦不敢預料必有成局也惟夏津清平高唐一帶實爲西北運河

屏蔽現在馬頰河北岸鄉團次第興築長牆一時尙難就緒臣已  
緘商英翰請將新到皖軍張得勝酒軍張從龍等酌派兩枝就近  
赴馬頰河南岸清平高唐一帶擇要扼剿遮護西北運防並咨商  
丁寶楨嚴飭馬頰河沿岸州縣趕緊集團勒限葺工以爲運東屏  
蔽實於大局有裨懇

聖恩飭下該撫臣等合力籌維勿稍遲誤理合附片具陳伏乞  
聖鑒訓示謹

奏

墊發陳國瑞軍餉片 同治七年五月十五日

再陳國瑞軍餉奉

旨飭下山西江西浙江各月撥銀一萬兩當經恭錄咨催去後現  
尙未奉報解昨據陳國瑞函稱該軍需餉甚急懇先撥借接濟臣  
以追勦喫緊暫爲設法挪墊銀二萬兩俾資支放惟臣所部各營  
食指浩繁艱絀異常仍咨催山西江西浙江趕緊撥解俟解到時  
應照數劃扣歸款聞該侍衛於初八日由清平拔隊東追尙未據  
報行抵何處理合附片陳明伏乞

聖鑒謹

奏

各軍兜剿連獲大勝摺

同治七年五月三十日

奏為擒逆由南折竄東北督飭各軍分投追截連獲大勝餘賊向東路分逃仍會合緊追兜剿恭摺馳陳仰祈

聖鑒事竊擒股於五月十三四日由臨邑被擊南趨當將籌商布置各情形繕摺馳報在案臣先令郭松林潘鼎新周盛波王心安

等由臨邑陵縣聯紮牆濠至恩縣德州境內與馬頰河民圩接續但空出臨邑南至濟陽黃河濱將及百里以冀偪城回竄西南一

隅再行就地圍紮輪番進戰或早收聚殲之功十四日晚聞宋慶張曜追至臨邑正議接連排紮惟兵力不敷須俟後有追軍踵至

商留協助詎該逆甫竄濟陽卽連夜折回十五日午刻已由濟境折回東北賊騎飄獵地勢平曠無從阻遏臣緘商前敵各統領並

令全軍翼長候補鴻臚寺少卿袁保恆馳往相機籌辦該逆既不

敢深入自應派隊分路兜剿張曜宋慶當卽拔隊向武定一帶探  
追郭松林潘鼎新周盛波王心安等所紮牆濠均於二十日後竣  
工卽酌留隊伍於長牆適中處紮立老營以資防護一面挑派精  
銳馬步進剿並令周盛波周盛傳帶八成隊進駐吳橋甯津交界  
以備各軍偪賊回竄時急起截擊二十二日張曜宋慶偵知賊竄  
海豐之北又折而南竄該軍卽由武定向濱州截追二十四日午  
刻遇賊於濱州西南之白家橋匪眾分伏村莊秫叢中及我軍行  
近竟敢三面圍裏宋慶等分投迎剿鏖戰半時斃悍賊甚夥該逆  
披靡狂奔追二十餘里兵勇渴乏已極正在覓水逆騎二三千乘  
閒絕轡馳來分撲李永芳蔣東才之隊宋慶張曜各督大隊潛出  
賊後將騎賊截爲兩段張逆復率全股來援復經擊敗斃賊二百  
餘人該逆遂向陽信竄去我軍追至天晚收隊此二十四日張曜

宋慶追勦獲勝之實在情形也郭松林王心安二十四日帶隊行抵樂陵東北適副都統春壽亦帶吉林黑龍江馬隊起至會齊進勦探報賊由陽信直奔海豐春壽於二更後向東馳進郭松林於三更後繼進二十五日辰刻春壽先抵海豐之郝家寨遙見賊騎四面包來春壽起派協領莫爾賚額侍衛春山分兩翼前進春壽督隊由中路進逆眾死力衝撲春壽督各營奮勇迎擊下馬接戰該逆亦改騎爲步蜂擁圍抄勢頗危急郭松林在後路聞信飛派馬步隊由西南馳援唐仁廉宋德鴻由右路直上胡良作李長樂蔡國祥由左路直上郭松林自率親兵與楊西平步隊由中路直入並令王心安率所部繞至賊後衝奪輜重賊見我軍勢猛紛紛敗散郭松林督同唐仁廉胡良作等馬勇由外殺入王心安由後衝出賊大股潰作數段春壽亦合力追殺該逆首尾難顧四路奔

逃莫爾慶額所帶丹丁正追賊聞又遇西南而撲出股匪兩隊拚  
命衝突郭松林春壽復揮所部助戰又將該逆殺散正督各軍儘  
力追剿天忽大雨遂收駐慶雲之余家店是日春壽馬隊雖有傷  
亡亦擒斬悍匪數百名郭松林等生擒八百餘名陣斬千餘名奪  
騾馬二千餘匹旗幟矛械無算並擒著名逆酋周老廣兄弟及大  
小賊目數十名二十六日郭松林督隊急追賊向正西竄走追四  
十餘里遇賊偶憩村落中見兵卽走殺獲二十餘名又追三十里  
該逆整隊迎拒郭松林率隊猛進賊復大潰乘勢掩殺斃老捻六  
十餘名生擒五十餘名奪騾馬百餘匹此郭松林等軍二十五六  
日追剿大獲勝仗之實在情形也郭松林春壽王心安等見賊受  
創後西竄愈急恐其乘隙竄渡東光吳橋一帶運河夜四鼓卽拔  
隊趨追二十七日賊眾由樂陵繞出甯津吳橋之間折向西南馳

百五十里申酉之交由吳橋之范屯餉店山崗人周盛波周盛傳  
紮營之毛家莊一帶周盛波等偵賊突至先將步隊埋伏密林中  
以馬隊誘賊當將馬營分作三路勢若箕張周盛傳將步隊亦分  
數起伏在馬隊左右賊騎兩萬餘分股猛撲我軍嚴陣迎敵約十  
餘合賊仍死拒不退周盛波復令下馬應戰鎗矛並舉刺傷悍賊  
多名步隊伏軍並起鎗礮雷發該逆措手不及轟斃人馬不計其  
數賊駭而奔我軍四處追殺縱橫十餘里凡賊所逃奔之路皆官  
軍扼紮之所伏屍遍野斃賊約千餘人奪獲騾馬二千餘匹陣斬  
及降眾三百餘人戰至二更敗賊不能合隊一股向東回竄一股  
繞由陵德交界之劉家莊向西南竄踞離德州七十里之楊丁莊  
孫世官莊方家莊一帶周盛傳是夜三更後復整步隊乘勢進襲  
周盛波督馬隊繼之馳二十餘里徑抵賊巢周盛傳親督小隊先



赴各莊偵察逆眾困乏露宿樹林下而楊丁大莊人馬尤夥密令各營分四面銜枚急進將該莊層層圍住號礮一聲鎗喊齊發該逆於睡夢中驚起迎拒人疲馬嘶我軍酣戰逾時五更後一擁而人該逆情急亂竄刀斫矛刺及自相蹂踐死者無算並鎗斃張總愚之姪張三彪生擒逆首李老懷及大小賊酋並賊婦幼孩數百名餘皆竄匿田隴秫苗之內附近各莊亦經周盛傳派隊兜逐惶遽四散直至天明各營始散隊追殺每人或得數賊數騎又奪獲騾馬三千餘匹二十八日辰巳以後左宗棠追軍亦至郭松林馬步相繼追及各有擒獲此二十七八日周盛波周盛傳等軍晝夜攔頭截追大獲勝仗之實在情形也臣在德州派兵梭探於中途秫叢內搜獲零星逃賊沿途民團截獲賊騎亦多蓋自今歲北征以來未有如是大捷實足以伸

天討而快人心惟據檢賊僉俱張逆被勦倉急拋棄甚眾日夜圖  
竄運河以求生路現在馬頰河西北長牆上與丁寶楨督催官紳  
趕緊興築漸有頭緒賊若遁入西南究多一層障礙若仍游弋東  
北捷地滅河防軍較厚都興阿業經前進冀無他虞惟東光南皮  
以上河西兵團皆少處處可慮劉松山郭運昌各軍諒能就近遮  
護運河水勢日涸先經咨商河南撫臣李鶴年開濬彰德之萬金  
渠堵築懷慶之九道埝使河丹河泉源下注口來運水僅增尺  
餘尚恐不足以限賊黃河伏汛迄未增漲曾國藩所派黃翼升歐  
陽利見張之萬所派姚廣武等各師船皆阻泊張秋河口未能北  
駛濟急殊深焦盼臣飭郭松林等仍乘勝會合各軍分路兜追周  
盛傳吳長慶仍駐陵德吳橋之交以備攔擊兼護東境運防總期  
早蕩餘氛仰慰

聖慮至此次截剿尤爲出力之上年肅清東捻案內擬保提督楊正國擬保總兵汪炳炎擬保副將宋冠軍衛汝成擬保游擊吳永紹任永清擬保參將周行發日昌衝鋒驍勇無匹可否顯懇

天恩先行給獎以示激勸楊正國擬請

賞換清字勇號汪炳炎宋冠軍吳永紹任永清周行發均擬請

賞給勇號衛汝成擬請

交軍機處記名以總兵儘先簡放其連日力戰陣亡之五品銜江蘇候補知縣黃振楚副將劉斌儘先游擊萬得勝儘先都司龍德

福並請

敕部從優議卹其餘出力弁勇可否咨臣查明彙案保獎出口

恩施所有各軍分投追截連獲大勝餘賊向東路分逃仍會合緊追兜剿各緣由謹繕摺由驛六百里馳陳伏乞

皇太后

皇上聖鑒訓示謹

奏

德平獲勝片

同治七年五月三十日

再正繕摺開接據潘鼎新二十八夜專弁馳報二十四日督軍追至武定東南水落坡一帶會同陳國瑞張曜宋慶由樊家橋分路兜擊均獲小捷二十五六等日追過海豐慶雲樂陵沿途亦有擒斬二十八日探賊將折往西南會同善慶溫德勒克西逕向德平攔擊午刻雨霽行十餘里至高家屯賊果從西北而來膽敢整隊迎撲各營馬步分頭截剿自午至申大獲全勝賊被鎗傷者屍橫滿地善慶溫德勒克西各帶馬兵左右兜逐酣戰數時奪馬尤夥賊敗後直追至解家店奎臺一帶更餘始行收隊營官蔡家旺受鎗傷甚重兵勇受傷二十餘名等情查該逆經郭松林周盛波周盛傳連日追截疊挫兇鋒是日敗竄德平西北復經潘鼎新善慶等攔頭截殺臣面詢來弁戰狀亦極痛快仍飭催各軍趕緊乘勝

國署兜迫以冀漸次埽除所有潘鼎新善慶等二十八日在德平  
大勝情形理合附片馳陳伏乞

聖鑒訓示謹

奏

李文忠公奏稿卷十三